

**Исфандиёр
Гулчехра Маткаримова
Абдуқаюм Йўлдошев**

УҚУБАТ

(Адашганлар қисмати)

Киноқисса

**Бош маслаҳатчи: Алишер Шарафутдинов,
Ўзбекистон Республикаси
Бош прокурори ўринбосари,
республикада хизмат
кўрсатган юрист**

Тошкент-2009

* * *

Намозшом палла.

Шаҳар.

Ҳашаматли тўйхонанинг кириш эшиги ёнидаги зинада ва майдончада яхши кийинган юзга яқин аёл-эркак меҳмонлар йўлга илҳақ қўз тикиб туришибди.

Бир томондан зар чопон кийган мусиқачилар зўр бериб карнай-сурнай чалишмоқда. Лунжи шишиб кетган карнайчи карнайини қўл билан ушламасдан осмонга қараб чалиб маҳоратини намойиш қилмоқда.

Олисдан машиналарнинг узлуксиз ва қаттиқ сигнали эшитилади. Ресторан ёнида турганлар ҳаяжонланиб-безовталаниб қолишади.

Йўлда машиналар карвони кўзга ташланади. Олдинда қора рангли узун “Лимузин”, унинг ортида худди шундай рангдаги еттита “Мерседес” ва бошқа хориж машиналари. “Лимузин”ни қувиб ўтган “Мерседес” машинаси ойнасидан ярим гавдасини чиқариб олган йигит келин-куёв ўтирган машинани видеога олмоқда.

Маҳалла ва “дом”ларнинг асосан хотин-халаж ва болалари кўчага чиқиб олиб машиналар карвонини ҳайрат ва хавас билан билан кузатишмоқда.

Сал тепаликда жойлашган, одамлар кўзидан панароқдаги уй девори ёнида дўппи кийган йигирма икки-йигирма уч ёшлардаги Акмал бежирим сумкачасини елкасига ташлаб олган ўн саккиз ёшлар чамасидаги Ҳулкар исмли қиз билан турибди. Ҳулкар машиналар карвонини энтикиб кузатмоқда.

– Кўрдингизми? Мана энди кўрдингизми? – дейди Ҳулкар ҳаяжонланиб. – Мана энди ўз кўзларингиз билан кўрдингизми?.

– Нимани? – ҳайрон бўлиб сўрайди Акмал.

– Шикарний тўй қанақа бўлишини! – дейди ҳамон ҳаяжони босилмаган Ҳулкар. Сўнг бармоқларини бир-бир букиб санай бошлайди: – Ўзингиз қаранг: тўй еттинчи числода бўляяпти, еттита иномарка хизматда, эшитишимча еттита энг зўр артист бирровга чақирилган эмиш... Энди энг зўрини айтайми?

– Айтинг, – дейди Акмал.

– Энг зўри шуки, – дейди тантана билан Ҳулкар, – бувижониси келин бўлаётган севикли неварасига атаб етти хонали дача совға қилибди.

Нафаси ичига тушиб кетган Акмал бир муддат анграйиб қолади. Кейин бир амаллаб тетик гапиришга уринади:

– Яхшиям бугун еттинчи. Агар йигирманчи число бўлганида нима қиласарди келинчакнинг бечора бувижониси...

Ҳулкар кулиб юборади:

– Э, афанди, бечора деманг! Бунақалар учун ўттизинчи бўлмайдими? Эллигинчи бўлмайдими? Ноу проблем! – Ҳулкар бирдан жиддий тортади. – Акмал ака, ҳазил ҳазил билан-у, лекин дугоналарим олдида мени уялтириб қўйманг. Хўпми?

– Ҳа, – дейди бўшашиб қолган Акмал. – Тўй – тўйдай бўлсин дейсизда.

– Именно! – дейди Ҳулкар. – Қаранг, нима, бошқалардан кам жойим борми! Майибманми? Пучуқманми? Худога шукр, тўрт мучам бут. Раз шундай экан, тўйим ҳам бошқа дугоналаримдан кам бўлмаслиги керак. Майли, ортиқча бўлсин демайман. Лекин кам ҳам бўлмасин. Тўғрими, Акмал ака?

Жиддий тортиб қолган Акмал унсиз бош ирғайди.

Ҳулкар маъюс тортиб қолиб, йиғламсирайди:

– Эҳ, агар адамлар бўлғанларида! Пулни қоғоз ўрнида кўрмасдилар-а! Дунё деганларини оёқларим остига тўкиб ташлардилар... Бунақа тўйлар чикора эди улар учун!

Акмал қизни юпатади:

– Қўйинг, Ҳулкархон. Насиб қилса...

Ҳулкар қувониб кулимсирайди ва эркаланиб йигитнинг пинжига тиқилади:

– Уялтириб қўймайсиз-а, Акмал ака?

Акмал бош ирғайди:

– Худо хоҳласа, уялиб қолмайсиз.

Ҳулкар баттар эркаланиб, йигитнинг елкасига бош қўяди:

– Ўзимнинг жўмард ақажонгинамдан!.. Бир тўй қиласилик, бир тўй қиласилик, кейин маза қилиб эслаб юрамиз!

“Лимузин” оҳиста майдонга келиб тўхтайди. Ҳайдовчи ёнида ўтирган куёвжўра тезлиқда машинадан тушиб, орқангиси очиб турди. Аввал қуёв тушади. Сўнг у келинчакни қўлидан тутиб туширади.

Шовқин-сурон авжга чиқади.

Келин-куёв куёвжўралар ва келиндугоналар ҳамроҳлигига қизил гиламча поёндоз этиб тўшалган, гуллар сочилган зиналардан оҳиста кўтарилиб ресторан ичкарисига киришади. Уларнинг орқасидан меҳмонлар ва мезбонлар эргашишади. “Тўйлар муборак!” қўшиғи янграйди.

Ҳашаматли безатилган улкан ресторан. Шифтдаги қандилларда, ён деворларда турфа ранг шарлар. Тўрда келин-куёв учун маҳсус жой ажратилган...

* * *

Терговчи кабинети.

Терговчи Акбарали Олимов асабий тарзда бир даста фотосуратларни диққат билан кўздан кечирмоқда.

Унинг қаршисида калта соқолли журналист, ёзувчи Маҳмуд Умаров ўтирибди. Унинг ҳам қўлида бир даста фотосурат.

– Увол-а, увол! – дейди Маҳмуд Умаров оғир сўлиш олиб, хўрсинаркан. – Келин бўлиб тушиб, бир уйни обод қиладиган сулув-сулув қизлар.

– Буларнинг орасида бир уйни обод қилишга қаноат қилмай, бошка жойларният обод қилишга астойдил отланганлари бор, – дейди терговчи ғазаб билан.

– Ҳа, – дейди Умаров. – Бир ёзувчимиз айтганидай, хўро занд хорижники бўлса, ётиб олиб сўришга ишқибозлар де.

– Ҳм, – деб қўяди Олимов.

Умаров қўлидаги бир суратга диққат билан разм солади ва афсус билан дейди:

– Бу ахир... ҳали гўдак-ку... она сути оғзидан кетмаган. Қара.

– Қани? – Олимов журналист кўрсатган фотосуратга кўз ташлайди. – Ҳа, тахминан ўн уч-ўн тўрт ёшларда. Бунақангги қизчаларга Қозогистонда ё Украинада янги исм ўйлаб топишади, ўн еттига тўлган деган паспорт беришади. Кейин... олиб чиқиб кетишади. Олинган маълумотларга қараганда, у ёқларда бунақа ёшдагиларнинг бозори чақон экан.

Журналист жаҳл билан ўрнидан туриб кетади ва хонада уёқдан-буёққа бориб келаркан:

– Палидлар! – дейди ғазаб билан.

– Яқинда битта шунақасини бир амаллаб қайтариб олиб келгандик. Уч йил юриб-юриб, битта қора танли бола орттириб келибди. Ўзининг айтишига қараганда, шунча уринсаям бола тушиб қолмабди. Ҳатто бечора етмиш килолик қопларният кўтарган. Умри билан берган экан-да. Хуллас, табиийки туғруқхонада боланинг онаси деган жойига сохта паспортдаги исм-шариф ёзилган. Энди, соқол, ўзинг тасаввур қилиб кўр: ҳақиқий исм-шарифиники-ку, бир амаллаб тиклаб олар. Аммо қоравойини қандай қилиб ўзининг номига ўтказишни билмай гаранг бўлиб юрибди. Бунинг устига одамларнинг гап-сўзи. Хуллас, эшитишимча, қайтиб кетмоқчи ҳам эмиш...

– Ситуация, – деб қўяди Умаров.

Улар суратларни кўришда давом этишади.

Суратлардан бош кўтарган журналист терговчининг столи устида турган чиройли қиз фотопортретини қўлига олади ва сўраб қолади:

– Айтгандай, Камола кўринмай қолдими?

– Юрибди, – дейди суратлардан кўз узмаётган терговчи.

– Тўй яқин эди шекилли, а, ўртоқ, – дейди журналист.

Олимов ноаниқ ғўлдираб қўяди.

Ҳайрон бўлган Умаров портретни жойига қўяди ва ўртоғига диққат билан қарайди:

– Ҳа, гапиргинг ҳам келмайди. Жа Лайли-Мажнун эдиларинг-ку. Бу йил академияни битирди, яқинда тўй деяётгандинг. Ё ораларингдан ола мушук ўтиб қолдими?

– Менга қара, – дейди терговчи сал асабийлашиб, – ё жим ўтири, ё кет. Ишлашга халақит бераяпсан.

– Но-но, – деб қўяди баттар ҳайрон бўлган журналист. – Менинг ёзувчилик ҳиссиётим бу ерда қандайдир гап борлигини айтаяпти.

Терговчи қўлидаги охирги суратни кўриб бўлгач, уни ҳам стол устига ташлайди ва ҳорғин тарзда креслосига суннади.

– Айтгандай, – дейди журналист. – Эртага китобимнинг тақдимот маросимга келасан-а.

– Бусиз иложи йўқ... – дея қўлларини кенг ёяди терговчи. – Сен одам савдоши ҳақида китоб ёзасан-у, мен тақдимотингга бормайманми...

Шу пайт қатор турган телефонлардан бири жириналайди.

Олимов шошиб трубкани кўтариб:

– Эшитаман! – дейди. Сўнг, бир лаҳзалик сукутдан кейин трубка микрофонини кафти билан ёпади ва Умаровга ўтиришга ишора қиларкан, шивирлади: – Интерпол.

Умаров шошиб стуллардан бирига ўтиради.

* * *

Интерпол марказий бюросининг иш кабинетларидан бири. Масъул ходим Азим Нуриев телефонда гаплашмоқда.

– Ҳозиргина оператив хабар олдик. “Мама” шу ерда.

* * *

Олимовнинг кабинети.

– Маълумот аниқми? – деб сўрайди Олимов.

* * *

Нуриевнинг кабинети.

– Аниқ, – дейди Нуриев. – Неварасини узатаяпти экан. Жиноят оламининг қаймоғи йиғилган бўлса керак ўзиям. Бир-иккита наҳанг ҳам тўримизга илиниб қолиши мумкин. Ололасизми?

* * *

Олимовнинг кабинети.

– Албатта, – дейди Олимов. – Жон деб! Ҳозироқ тергов-тезкор гуруҳини йиғаман!

* * *

Нуриевнинг кабинети.

– Яхши, – дейди Нуриев. – Ўттиз дақиқадан кейин йўлга тушамиз.

* * *

Олимовнинг кабинети.

– Хўп, – дейди Олимов ва трубкани қўяди.

- Тинчликми? – дейди Умаров.
- Омина Асилова ўз оёғи билан келиб қолибди, – дейди шоша-пиша қоғозларни йиғишириётган Олимов.
- Наҳотки? – ҳайрон бўлади Умаров.
- Тўйга бирровга келганга ўхшайди, – дейди Олимов. – Шошилиш керак. Сен боравер, соқол. Эртага қўнғироқлашамиз. Сени нима қизиқтириб қолса, ҳаммасини бафуржা айтиб бераман.
- Нега энди бораверарканман, Акбарали? – дейди Умаров хафа бўлиб. – Нима, мен шундай операцияда шахсан иштирок этиш имкониятини кўлдан чиқарадиган аҳмоққа ўхшайманми?
- Менга қара, Махмуд, – дейди Олимов. – Хафа бўлмагин-у, лекин очигини айтсам, сен ҳозир шундай хавфли операцияда иштирок этишга ҳаракат қилаётган аҳмоққа ўхшаяпсан.
- Бу билан мени қўрқитолмайсан, – дейди Умаров. – Кейин мен ўзим қўрмаган, билмаган нарсамни ёзадиган одам эмаслигимни ҳам яхши биласан. Қўй, баҳслашиб ўтирмайлик, яхшиси менгаям битта бронжилет буюртма қил. Менинг журналистлик ҳиссиётим шов-шувли мақола ёзишимдан хабар бериб турибди.
- Менга ўзини керак эмас жойдаям ўтга-чўққа уриб юрган марҳум қаҳрамонлар керак эмас, – дейди Олимов кескин тарзда. – Яна ўтган сафаргидай диктофонингни кўтариб олдинга ўтиб оладиган бўлсанг, билиб қўй, аяб ўтирмайман, ўзим шартта оёғингдан отиб ташлайман.
- Умаров қўл силтайди:
- Бир бўлиб қолди-да, ўртоқ. Бошқа такрорланмайди.
- Лекин энг орқада юрасан. Иккита аскарни сенинг ўзингга бириктириб қўяман. Тўйхонагаям ҳамма иш битгандан кейин кирасан! Келишдикми? – дейди Олимов.
- Келишдик, – дейди Умаров.
- Кетдик унда! – дейди Олимов.
- Икковлон шошиб хонадан чиқиб кетишади.

* * *

Тун.

Тошкент.

Прокуратура биноси ёнидаги чироқлар билан ёритилган майдонча.

Терговчи билан журналист машиналар томон илдам кетишмоқда.

Шу пайт уларнинг йўлидан эллик беш ёшлардаги, рўмол ўраган, аммо соchlари тўзғиб кетганлиги кўриниб турган, тинмай йўталаётган аёл чиқади.

– Латофат опа, бу сизми? – дейди Олимов ҳайрон бўлиб.

Аёл кўзларида ёш билан билан ёлвориб унга мурожаат қиласди:

– Топилдими? Ўҳ-ҳӯ! Ўҳ-ҳӯ! Топилдими Ноилам? Топилдими кўзимнинг қароги, а? Ўҳ-ҳӯ!.. Топилдими?

Олимов аста аёлнинг елкасидан қучади:

– Топамиз, албатта топамиз, – дейди меҳрибонлик билан.

Шу пайт Латофат хола чиққан тарафдан уларга яқинлашган олтмиш ёшлардаги, мўйловли Норбой тоға таъна оҳангиди дейди:

– Бу ваъдани уч йилдан бери эшитавериб чарчадик, ука. Мана, охири холангнинг эси кирап-чиқар бўлиб қолди, қишин-ёзин кўчада сарғайиб туравериб ўпкасини шамоллатиб қўйди.

Олимов ўзига жовдираб қараб турган Латофат холадан кўзларини олиб қочаркан:

– Изляпмиз, изляпмиз, – дейди.

Норбой тоға асабийроқ тарзда жеркиб беради:

– Менга қара, ука, одам игна эмаски, ғарам ичида йўқолиб кетса. Тўққизинчи синфни битирган қизни куппа-кундуз куни машинага босиб олиб кетишса-я! Нима деган гап бу ахир?!. Инсоф борми ўзи сенларда?! Масъулият борми ўзи сенларда? Давлат сенларни нега ўқитган? Шу халқнинг болаларини ҳимоя қил, йўқолиб қолса топиб бер деб ўқитмаганми?

– Норбой ака! – дейди Олимов. – Изляпмиз. Кечагина яна бир группасини қайтариб қолдик. Улардан иккитаси ўн тўрт-ўн беш ёшида ўғирлаб кетилган экан. Қизингизни ҳам бутун кучларни ишга солган ҳолда изляпмиз. Худо хоҳласа...

– Бу аҳволда яна эллик йил излайсанлар, – норози бўлиб тўнғиллайди Норбой тоға. – Биз гўримиздан ўсиб чиққанимизда ҳам излаётган бўласанлар.

– Норбой ака! – дейди Олимов тоқатсизланиб.

– Лекин билиб қўй, ука! – дейди Норбой тоға тажанглик билан. – Агар тополмасаларинг, билиб қўй, икки дунё қўлим ёқангда бўлади, ха! Чунки излаётганларнинг бошлиғи сен экансан!.. Билиб қўй, сенинг ишпишингни, мансабингни, обрўйингни қизимнинг бир тола сочига алмаштирамайман, ука! Бир тола сочига...

Норбой тоға ҳўнграб йиғлаб юборади.

Эрига аланг-жаланг қараб турган Латофат хола тўсатдан изиллаб йиғлайди ва Олимовни маҳкам қучиб оларкан, хирқираб, кўз ёшлари аралаш хитоб қиласди:

– Қизалогим топилдими? Ўҳ-ҳў! Ўҳ-ҳў!.. Мен билардим, билардим топилишини, билардим... Ўҳ-ҳў...

Кўз ёшларини шоша-пиша артган Норбой тоға жон ҳолатда рафиқасини қучиб, Олимовдан ажратади ва нарига судрайди.

Латофат хола энди хурсанд бўлиб кулганча эрига мурожаат қилмоқда:

– Йиғламанг, дадаси, йиғламанг. Ўҳ-ҳў!.. Ундан кўра бу йигитга суюнчи беринг, дадаси, катта суюнчи беринг! Қўчкор атанг! Ўҳ-ҳў! Ўҳ-ҳў!.. Қизалогимизни топиб бергани учун! Ноилажонимизни топиб бергани учун!.. Ўҳ-ҳў...

Олимов қуёй лабини тишлиганча бир муддат жойида серрайиб туриб қиласди.

Умаров машиналар томон юради.
Бирдан шаҳд билан машиналар турган томон отилган Олимов ғазаб билан пичирлаб сўқинади:
– Э, ўша Оминаларининг!..

* * *

Тўйхона.
Улкан залда тўй давом этаяпти.
Тўкин дастурхон.
Ўртадаги каттагина экранда шу тўй манзаралари намойиш этилиб турилибди.
Ўртада раққоса рақс тушмоқда. Таниқли қўшиқчилардан бири ашула айтмоқда.
Қистир-қистирлар долларларда.

* * *

Тўйхонанинг алоҳида бўлмаси.
Чеккароқда катта экранли телевизор. Унда ҳам тўй маназараси.
Ўртадаги столга безалган тўкин дастурхон ёнида ёши олтмишлардан ошган, аммо ҳамон ёшлигидаги хусн-тароватини йўқотмаган Омина Асилова виқор билан ўтирибди. У телевизор экранидан кўз узмаяпти.

* * *

Тун.
Ҳовли.
Акмал ўз хонасида. У мук тушиб олганча дафтар саҳифасига бир нималарни қайта-қайта ёзиб, митти калькульяторда ҳисобламоқда. Гоҳида гўнгиллаб овоз ҳам чиқаради:

– “Лимузин” соатига юздан бўлса... Пишириқлар ўзимиздан бўлса... Ароқ билан напиткалар ҳам... Шунда агар ресторон арендаси бир яримга тушса... Ҳаммаси бўлиб... Вой-бўй!.. — деб юборади оғир “уф” тортган Акмал асабий тарзда. – Агар бутун ойлигимни емай-ичмай, бир тийининиям ишлатмай йигсан, олтмиш йиллардан кейин Ҳулкар айтганчалик бўлмасаям, сал бундайроқ тўй қила олар эканман... Э шунаقا тўйни ўйлаб топган одамнинг падарига минг лаънат!

Акмал дафтар саҳифасидаги рақамларга қарайди ва ваҳима билан бошини маҳкам чанглаб олади. Сўнг жаҳл билан дафтарни бурчакка улоқтириб юборади-да, чироқни ўчирасола ўринга ётиб олади.

Тун зулмати чўқади.

* * *

Ёпиқ бино.
Махсус қисм қўшинлари ҳарбий либосларини, ўқдан ҳимоя қилувчи мосламаларини, юз ниқобларини ошигич тарзда кийишмоқда.

Офицер кийимидағи бир ўрта ёшлардаги киши ҳеч кимга сездирмасдан чеккароққа ўтади ва қўл телефонидаги бир тугмачани босгач, телефонни қулоғига яқин олиб кели пицирлайди:

– Атас! Максимум бир соат...

Сўнг офицер илдам бориб кийинаётганлар сафига қўшилади.

* * *

Тўй давом этмоқда.

Бошловчи тантанали тарзда эълон қилади:

– Диққат! Диққат! Хонимлар ва жаноблар! Мана, ниҳоят икки ёш баҳт оқшомининг кульминацион нуқтасига ҳам етиб келдик. Яъни Омина опамнинг ўzlари икки ёшни табриклайдилар!

Бирдан тўйхонага жимлик чўқади.

Мехмонлар атрофга аланглаб, Омина Асиловани қидира бошлайдилар.

Қўр тўкиб ўтирган, юзида чандиги бор олтмиш беш ёшлардаги бақувват меҳмон ёнидаги шеригига маънодор тарзда аста бош иргаб қўяди ва хириллаган овозда:

– Ўзлари... – деб қўяди.

Шу пайт тўйхонадаги катта экранда Омина Асилованинг сиймоси пайдо бўлади.

– Азизларим, – дейди Асилова табассум билан. – Менинг азизларим, қадрдонларим! Вакт ажратиб, камтарин тўйимизга ташриф буюрганингиз учун ҳаммангизга катта раҳмат.

* * *

Тўйхонанинг алоҳида бўлмаси.

Видеокамерага қараб жиддий тарзда гапираётган Омина Асилова.

– ...Жондан ширин неварам Моҳидил. Мен сенинг турмуш ўртоғинг Рашидjon билан баҳтли-саодатли бўлишингни истайман. Илойим ҳеч қачон юзларингдан табассум аrimасин. Узоқ умр кўриб, баҳтли яшанглар... Бу шафқатсиз ҳаётда ўз ўрниларингни топиб яшанглар...

* * *

Тўйхона.

Экранда Омина Асилова гапирмоқда.

– ...Ҳаммангизга раҳмат, азизларим!

Гулдурос қарсаклар янграйди.

Бошловчи тўлқинланиб эълон қилади:

– Бундай ажойиб, самимий, ҳар бири ноёб гавҳарга teng қалб сўзларидан кейин биз навбатни севимли шоиримизга берамиз! Марҳамат!

Бошловчи ёнига ҳар томонга эгилган қўйи таъзим қилганча шоир чиқиб келади.

* * *

Тўйхонанинг алоҳида бўлмаси.

Омина Асилова яна викорли ва жиддий қиёфада экранга тикилиб ўтирибди.

Шу пайт кўзойнакли, каттароқ ёшдаги, тепакал ёрдамчиси Кабиров аста унинг ёнига яқинлашади ва қулоғига ниманидир шивирлайди.

Омина Асилова норози кайфиятда ғудранади:

– Тўйниям заҳар қилишади булар! – Сўнг сўрайди: – Қанча вақтимиз бор.

– Максимум бир соат, – дея жавоб беради Кабиров.

– Бу пайт ичида биз Канада чегарасига бўлмасаям, Чимкентга етиб оламиз, – истеҳзо билан гапиради Асилова. Сўнг буюради: – Йиғиштир ашқол-дашқолингни... Кетдик.

Асилова шошилмасдан ўрнидан туради.

* * *

Тўйхонанинг орқа эшиги.

Эшик ёнига қора рангли “жип” келиб тўхтайди.

Унинг эшиги очилади.

Машинага Омина Асилова чиқади.

Эшик ёпилади.

Кабиров ҳайдовчи ёнида ўтирган ҳайдовчи йигитга буюради:

– Қозогистонга!

“Жип”нинг олдида ва орқасида биттадан машина бор.

Машиналар карвони йўлга тушади.

* * *

Тўйхона.

Тўй якунланай деб қолган.

Тўйхона атрофини қуролланган махсус қисм аскарлари ўраб олишади.

Тўйхонага терговчи Акбарали Олимов бошчилигидаги тергов-тезкор гурухи аъзолари, Интерпол ходими Азим Нуриев, никобдаги аскарлар бостириб киришади. Уларнинг сафида қўлида митти видеокамера тутиб олган журналист Махмуд Умаров ҳам бор.

Фонограммада қўшиқ айтиётган қўшиқчи бу манзарани кўриб оғзини очганча қолаверади. Аммо қўшиқ янграйверади. Мехмонларнинг бир қисми ҳайрон бўлиб ўринларидан туриб кетишади.

Ниҳоят қўшиқ тўхтайди.

Стол атрофида ўтирган меҳмонларга дикқат билан қараб кетаётган Азим Нуриев ўзига кўзлари тушиши билан дарҳол пастга қараб олишга интилаётган иккита басавлат киши қаршисида тўхтайди ва:

– Ўҳ-ҳў, биз излаб юрган таниш чеҳралардан-ку! – дейди. Сўнг ортида турган аскарларга ишора қиласади: – Олиб чиқинг.

Икки қуролланган, ниқобли аскар икки меҳмон ёнида пайдо бўлади.

Фуқаро кийимидағи тезкор-тергов гуруҳи ходимлари диққат билан меҳмонларни қўздан кечиришмоқда, улардан бир нечтаси жангчилар ҳамроҳлигида алоҳида “VIP-зал” ва бошқа бўлмаларга бирма-бир кириб чиқишишмоқда.

Нуриевнинг ёнига басавлат бир масти киши чайқалиб яқинлашади.

– Мени танийсанларми, мен Асадуллаев бўламан, – дейди у. – Марҳамат қилиб, аввал узр сўраб, кейин бир туёқларингни шиқиллатиб қолинглар-чи. Ё керакли жойга қўнғироқ қиласми? – У чўнтағидан қўл телефонини чиқаради. – Лекин унда погонларинг юлиниб, думларинг туғилиши аниқ. Гаррантия бераман!

Акбарами Олимов ранги оқариб, қўзлари олайиб кетган семиз бошловчи ёнига боради ва унинг қўлидаги микрофонни олади.

– Ассалому алайкум, – дейди терговчи. – Тўйлар муборак. Ёшлар баҳтли бўлишсин. Афсуски икки-уч дақиқа вақтингизни олишга мажбурмиз. Хизматчилик. Хуллас, одам савдосида, наркотик моддалар олди-сотдисида, уюшган жиноий гуруҳ ташкил этишда айбланаётган, халқаро қидирудаги бир... аёлни олиб кетиш учун келдик. Гап ким ҳақида кетаётганлигини тушунган бўлсаларингиз керак.

Олимовнинг ёнига қирқ беш ёшлардаги бир жувон яқинлашади.

– Тўйни бузишга ким сизларга хуқуқ берди? – дейди у йифламсираб.
– Мусулмонмисизлар ўзи? Ўзбекмисизлар?

– Кечирасиз, опа, сиз ким бўласиз? – дейди Олимов.

– Мен келиннинг онаси Райхон Асильова бўламан, – дейди жувон. – Агар сиз тухматга қолган онамни назарда тутаётган бўлсангиз, у киши ўн йилдан бери чет элда яшаётганлигини ҳам билсангиз керак.

– Буни биламиз, – дейди Олимов. – Лекин у кишининг бугун шу ерга келганлигини ҳам биламиз.

– Сиз ҳам тухматчиларга шерик бўлманг! – дейди Райхон. – Агар қўлингиз шунчалар узун бўлса, ўша ёқларга бориб қилинг бунақанги қилиқларингизни. Лекин уч-тўртта ғаламиснинг иғвоси билан қизимнинг тўйини бузишларингга йўл қўймайман. Ҳаққингиз йўқ!

Уларнинг ёнига чопон кийган эллик беш ёшлардаги Бадриддин амаки яқинлашади.

– Соат ҳам ўн бирдан ошиб қолибди, жиян, – дейди у Райхонга мурожаат қилиб. – Агар рухсат этсанг, тўйни ёпсак.

Райхон қўл силтайди:

– Майли. Бу ёғи энди барибир совуган ошдай...

Нуриев гарангсиб турган Олимовнинг ёнига келади ва:

– Борми? – деб сўрайди.

Олимов бош чайқайди.

– Бўшашма! – дейди Нуриев паст овозда. – Яқинларини, меҳмонларини сўроқ қилинглар. Бири бўлмаса бошқаси ёрилиб қолар.

– Уриниб кўрамиз, – дейди Олимов.

* * *

Тўйхонанинг алоҳида бўлмаси.

Акбарили Олимов асабий тарзда сўроқ ўтказмоқда.

– Сиз менга мусулмончиликни, ўзбекчиликни пеш қиласиз, – дейди у Райҳонга. – Лекин анави шоҳона дастурхон, қўша-қўша ҳовлилар, машиналар, қулоқ-бўйинларингиздаги олтин-бриллиантлар кимларнингдир топталган номуси, қулларча меҳнати, қолаверса ҳаёти эвазига келаётганлигини бошқалар билмаса ҳам сиз жуда яхши билсангиз керак.

– Бунинг бари онамга қилинган тухмат! – дейди Райҳон қатъият билан. – Қайси ишнинг айбдорини тополмаган бўлсаларинг, барини онамга ёпиширгансизлар! Аслида онам ҳақиқий тадбиркор. Қўлида пул ўйнаётган тадбиркорнинг эса душманлари кўп бўлади. Нима, улар шу ерда, тўйда йўқ эди деб ўйлайсизми? Қанчаси ҳасаддан, аламдан ёрилай деб бизга ўлим тилаб турганлиги, қўйиб беришса қорнимизни ёриб, қонимизни ичишлари аниқ. Шунинг учун бунақанги тухматларга ишонмайман. Уялмайсизларми бир бечора хотиннинг бошига шунча мағзава ағдаришга? Ўзи йўқ деб энди, кўчада бирорни бўғизлаб кетишса ҳам онамни гуноҳкор қилавераркансизларда?! Ахир онам қачонгача емаган сомса учун пул тўлаб юради?

– Буларнинг ҳаммаси исботини топган факт ва далиллар! – дейди терговчи жаҳл билан. – Шунинг учун сичқон-мушук ўйнамайлик-да, очигига кўчайлик. Онангиз бугун тўйга келган, шундайми?

– Қайтариб айтаман, онам келин-куёвни табриклаб, ўша ёқдан бир дисқ юборган экан. Мехмонларга шуни қўйиб бердик, – дейди Райҳон.

– Буни эшитдим, – дейди терговчи телевизор тугмачасини босаркан. Экранда келин-куёвни табриклаётган Омина Асилова кўринади. – Лекин бу чехрани қаранг... Юз ифодасини... Онангизнинг шу ерда ўтирганлиги шундоққина кўриниб турибди-ку. Бунинг учун психолог бўлиш ҳам шарт эмас.

– Техника асрида яшаяпмиз, – деб қўяди Райҳон. – Масофа нисбий тушунчага айланган. Мен хоҳласам ҳозир Америкадаги дугонам билан ҳам компьютер орқали юзма-юз гаплашишим мумкин.

– Буни биламан, – дейди қовоғи тушиб кетган Олимов.

– Кетсам майлими? – дейди Райҳон. – Қизим бечора гўшангага ҳам бормасдан, ташқарида титраб-қалтираб мени кутиб ўтирибди. Гўё мени қамаб қўйишадигандай.

– Узоққа кетмайсизми? – деб сўрайди терговчи.

– Йўқ, – дейди Райҳон. – Ёшларга кичкинагина бир ҳовлича совға қилгандик. Куёв аллақачон ўша ерда.

Олимов истеҳзоли кулимсирайди:

– Кичкинагина бўлса майли, боринг.

Райҳон чиқаётуб ўгирилади:

– Ҳали кўрасиз, бир кун келиб онамга тухмат қилаётгандарнинг ўзлари шармандаи шармисор бўлиб қолишади. Сиз билан ана ўшандагаплашамиз.

Олимов елка қисиб қўяди.

Райхон чиқиб кетади.

* * *

Тун.

Кичкинагина ним ёруғ хона.

Столда шам хира ёниб турибди.

Майкачан, елкаларига, билакларига турли татуировкалар чизилган бақувват эркак – Писка лақабли қамоқдан чиқсан жиноятчи ўтирибди. Унинг юзи кўринмайди. Қоронғиликда кимдир сассиз юриб келади ва столга каттагина бир конвертни қўяди. Эркак конвертни очади. Евролар дастаси.

– Шу оқшом... – деган хириллаган овоз эшишилади.

Майкачан эркак бош иргаб қўяди.

Пул олиб келган одам унга диққат билан қарайди. Шунда унинг ўзининг юзи кўриниади. Бу тўйда иштирок этган, юзида чандиғи бор меҳмон.

Чандиқли одам ортга бурилади ва сассиз юриб хонадан чиқиб кетади.

* * *

Олимов кейинги хонага киради. У ерда терговчи Шомуродов шоирдан у-бу нарсаларни сўрамоқда.

– Ахир кимдир атайлабдан бориб чақиргандир сизни бу тўйга! – дейди жигибийрони чиқиб терговчи. – Ўзингиздан ўзингиз бу ерда осмондан тушгандай пайдо бўлиб қолмагандирсиз.

– Тўппа-тўғри, акажон! – дейди жиккакина шоир эҳтиром билан қўл қовуштиаркан. – Кимдир тўйга айтди, лекин эсимда йўқ.

– Унда қандай қилиб бу ерга келиб қолганлигинги ҳам эсингида йўқдир, – дейди Олимов.

– Ўлай агар эсимда йўқ, акажон! – дейди шоир жон ҳолатда. – Кечадан буён тарангман. Бир пайт қарасам тўйда ўтирибман.

– Хўп, шунақа ҳам дейлик, – дейди Шомуродов. – Лекин сиз “Омина опамларга” деб шеър ўқидингиз, у киши ҳақида достон ёзаётганингизни эълон қилдингиз. Демак, олдиндан тайёрланиб келгансиз, шундайми? Балки кўришгандирсиз ҳам?

– Э, мен вообще олдиндан тайёрланиб-пайёрланиб ўтирмайман, акажон – дейди шоир. – Мен бу соҳада профессионалман. Уч-тўртта дежурний шеърим бор. Шуларга тўй эгасининг исмини қўяман-да, шартта ўқийман-ташлайман.

– Лекин... – баттар ҳайрон қолади Олимов. – Сиз шеърингизни келин-куёвга эмас, айнан Омина опангизга атаб ўқигансиз-ку.

– Э, қарасам, сўзга чиққанларнинг ҳаммаси қандайdir Омина опани оғизларидан бол томиб мақтаб ётишибди, ақажон. Шунга... кўпдан қолмай деб... – дейди шоир.

Шомуродов пульт тугмачасини босади.

Экранда жўшиб шеър ўқиётган шоир:

– Сиз осмонсиз, бағрингизда дур ва жавоҳир,

Сиз уммонсиз, мангуликка дахлдор, доир...

– Кўрдингизми, кўрдингизми, ақажон?! – дейди шоир бирдан жўшиб кетиб. – Мен дарров ойликка яшайдиган одам бундай тўй қилолмаслигини билганману, аслини олганда шеърим билан Омина опани боплаганман!

– Қанақасига? – анграйиб қолади Шомуродов. – Мана, осмонсиз, денгизсиз деб мақтаб турибсиз-ку!

– Э, шундай истиоралар билан боплаганман-да опани! – дейди шоир гердайиб. – Яъни осмон дегани аслида совук, бўум-бўш, тартибсиз ҳаракатли ва зим-зиё бир макон. Мен опани мана шундай ўлик осмонга қиёс қилганман, ақажон. Боплаганман!

Шомуродов қулиб юборади:

– Унда денгизга ўхшатганда қандай боплагансиз?

Шоир пинак бузмайди:

– Мен опани қуриб бораётган Орол денгизига ўхшатганман. Боплаганман, ақажон, боплаганман!

– Демак, опа ҳақида бошқа ҳеч нарса билмайсиз, – деб сўрайди энсаси қотган Олимов.

– Кўрмаганман ҳам, эшитмаганман ҳам, билмаганман ҳам... – дея бидирлаб кетади шоир навбати билан кўзларини, қулоқларини ва оғзини беркитаркан.

– Боринг, – дейди ҳафсаласи пир бўлган Шомуродов.

Шоир пилдираб юриб хонадан чиқиб кетади.

Шомуродов Олимовга қараб елка қисиб қўяди.

– Бўшашма, – дейди Олимов унга. – Буниси бўлмаса бошқасидан тайинли бир гап чиқиб қолар... Қани, мен бошқалардан ҳам бир хабар олайчи...

Олимов хонадан чиқади ва кейинги хонага киради. Бу ерда бошқа бир терговчи бошқа бир меҳмонни сўроқ қилмоқда. Олимов бош ирғаб, кўз ишораси билан “Бирон янгилик борми?” деб сўрайди, бунга жавобан терговчи ҳорғин бош чайқайди.

Олимов кейинги хонага йўл олади.

* * *

Тун.

Тўйхона ёнидаги ёритилган майдон.

Енгил машиналар, ҳарбийларнинг катта машинаси қаторлашиб турибди.

Махмуд Умаров бир чеккада диктофонига нималарнидир паст овозда гапирмоқда.

Хорғин қиёфали терговчи Олимов хизмат машинаси томон яқинлашади. Умаров унга пешвоз чиқади.

— Шундай қилиб, дўстим, — дейди Умаров, — “Мама Роза”ни тутиш бўйича операция кераксиз шовқин-сурону самарасиз хотима билан якун топди. Интерполнинг иккита наҳангни тутганини хисобга олмаганда, албатта. Репортажимизни шундай якунлаймизми?

Олимов беҳафсала қўл силтайди:

— Шунақага ўхшайди.

Олимовнинг қўл телефони жиринглаб қолади.

— Лаббай, — дейди терговчи телефонни қулоғига тутиб ва бирдан хавотир, ваҳима билан сўрайди: — Ростданми? Нега... нега ундан қилибди?.. Хўп, тез милиция, “тез ёрдам” чақиринг.

— Тинчликми? — дейди журналист хавотирга тушиб.

— Рашид деганлари ўзини осиб қўйибди, — дейди Олимов.

— Қайси Рашид? — сўрайди Умаров.

— Бугунги куёвтўра. Омина Асилованинг невара куёви, — тушунтирган бўлади бир нарсаларни зўр бериб ўйлаётган Олимов.

— Йўғ-э? — хайратга тушади Умаров.

— Мен ҳозир... — дея Олимов машина томон чопади.

Умаров ҳамон ишлаб турган диктофонга гапиради:

— Ҳали бу репортажимизга нуқта қўйишга эрта шекилли. — Шундай дея у Олимов ортидан югуради.

* * *

Кундуз.

Каттагина бир хона.

Унда ўн чоғли йигитлар тўпланишган.

Тўрда, эман стол ортида ишга ёлловчи Алимардон исмли қирқ ёшлардаги эркак ўтирибди. Унинг бўйнида энли тилла занжир, бармоғида тилла узук, катта соат тақиб олган.

— Ишлаганда қулдай ишлаш керак, яшаганда шоҳдай яшаш керак! — дейди у. — Мен у ёқда шоҳга ўхшаб яшадим! У ёқларда пул шундайгина экиб қўйилган, факат уни териб оладиган мард керак!

— У ерда нима иш қиласиз ўзи? — деб сўрайди ўтирган йигитлардан бири.

— Ҳар хил. Бирорлар ресторанда официант бўлади, бирорлар фабрика ё заводда, ё қурилишда ишлайди, — дейди Алимардон.

— Ойлигини қанча дедингиз? — эҳтиром билан сўрайди Акмал.

— Ўртacha бир ярим минг, — киприк қоқмай жавоб қайтаради Алимардон. — “Кўк”идан!

Йигитларнинг хитоблари эшитилади:

— Зўр экан!..

— Бир ярим минг-а!...

— Бу бизнинг пулга биласанми қанча бўлади! Эҳ-хе...

— Хуллас, — Алимардон соатига қарайди, — ҳозир вақтим зикроқ.

Яна бир группа талабгорлар кутиб турибди. Менга аниқ борадиганлар рўйхати керак. Бугун фамилиясини ёздириб қўйиб, эртага “йўлга пул тополмадим” деб баҳона қиладиганлар менга керак эмас.

Даврон исмли кўзойнакли йигит ўрнидан сакраб туради:

— Мен бораман. Йигит бошига уч марта омад қуши қўнади, дейишади. Кўрқиб-писиб ўтирсам, қушнинг учиб кетиши аниқ. Ўйчи ўйига етгунча таваккалчи тўйига етибди. Яна бир марта қисқароқ қилиб тушунтириб беринг.

— Хўп, қисқаси бундай бўлади. — Алимардон ён дафтарчасини очади. — Қайтараман: боришни хоҳлаганлар менга паспортини, икки минг доллар взнос пули беради. Мен бу пулга самолётга билет оламан. Қолган пул фирманинг ҳисоб рақамига қўйилади. Аввал Москвагача борилади, у ерда сизларни фирмамизнинг вакили кутиб туради. Кейин ўша ернинг ўзида сизларни ишга тақсимлашади.

— Кейин-чи? — деб сўрайди Даврон.

— Кейин ишлайверасизлар. Ойликларинг конвертда берилади. Хоҳлаганларга пластик карточка очилади.

— Уйга-чи, уйга юбориб турсак бўладими? — деб сўрайди бир йигит ҳовлиқиб.

Алимардон ҳижжалаб тушунтиришга ўтади:

— Бўлади. Айтдим-ку, “Вестерн Юнион” билан ўзим ойига уйга беш юз-олти юз юбориб турганман деб. Менга қаранглар. Мен бировни мажбурлаётганим йўқ. Шусиз ҳам желаюшийлар тиқилиб ётибди. — Алимардон хиргойи қиласи: — “Сен бўлмасанг бошқаси...”

— Мен бораман дедим-ку! — дея Даврон бир қадам олдинга чиқади.

— Хўп. Яна ким? — деб сўрайди Алимардон.

Яна олти йигит олдинга чиқади. Булардан бири Акмал.

— Мен бир нарсани билмоқчийдим, — дейди Акмал. — Тахминан олти-етти ойлардан кейин уйга қайтсан бўладими?

— Албатта, — дейди Алимардон. — Лекин бунча тез?

— Шу... тоғамнинг йилини ўтказишгандан кейин... тўйим бўлиб қолиши мумкин, — дейди уялинқираб Акмал.

Алимардон ёйилиб илжаяди:

— Ҳа, гап бу ёқда денг, куёвтўра. Асло хавотир олманг. Ташкиллашибирасиз. Керак бўлса тўйига арзирли тўёна ҳам қиласиз.

— Раҳмат, — дейди хурсанд бўлиб кетган Акмал.

Алимардон:

— Худо хоҳласа якшанба куни йўлга тушамиз.

— Бунча тез? — дейди Даврон.

— Ишлагандан кейин тез-тез ишлаш керак, — дейди Алимардон. — Бўпти, мен кетдим.

Алимардон тез-тез юриб чиқиб кетади.

Акмал унинг ортидан оғзининг таноби қочган ҳолда қараб қолади.

Хонада Акмал билан Даврон қолади. Қолган йигитлар шошиб чиқиб кетишади.

– Сен икки минг долларни қаердан оласан? – деб сўрайди кўзойнакли йигит Акмалдан.

– Қишлоғимизда биттаси одамларга қарз бериб туради, процентга, – дейди у.

– Ишқилиб, бирон нимани гаровга қўйдирмайдими? – сўрайди Даврон.

– Эшитишимча, гаровга машина ё уйни қўйдиаркан, – дейди бирдан жиддий тортиб қолган Акмал. – Лекин на илож. Бой қариндошим бўлмаса. Ўшанга ялиниб бораман-да энди.

– Бизда ҳам битта шунақанги абраҳ судхўр бор, – дейди Даврон. – Лақаби “Қори Ишкамба”. Процентининг процентигача суғуриб олади, абраҳ. Қани, менам бир бориб кўрай-чи.

Икковлон хонадан чиқиб кетишади.

* * *

Тун.

Келин-куёвга ҳадя қилинган улкан қасрмонанд ҳовли.

Улкан биллур қандилли хоналардан бирида марҳув куёвни ерга ётқизиб қўйишиган.

Юзида вахима, қўрқув акс этган одамлар ўзаро шивирлаб гаплашишмоқда. Қўриқчилар тош каби қотишиган.

Шу пайт қаср ёнига катта тезликда келиб тўхтаган машина кескин тормоз бериб тўхтайди.

Дарвоза очилади ва келинлик либосидаги Моҳидил отилиб киради. У:

– Рашид ака! – дея бўзлаганча ўзини шу томонга уради.

Аёллар пиқиллаб йиғлаб юборишади.

Келин марҳум куёвга яқинлашган маҳал қирқ беш ёшлардаги, бақувват жувон Хумора опа уни маҳкам қучогига олади.

– Моҳидил... – ўқраб йиғлаб юборади жувон.

Келинчак жон-жаҳди билан куёв томон интилади.

– Рашид ака! – дея бақиради.

– Ўзингни бос, Моҳидил, – дейди Хумора опа. – Энди уни қайтаролмайсан.

Бир четда ғазаб билан тасбех ўгириб турган оқ рўмолли кампир – Ҳожи она ғазаб билан гапиради:

– Худонинг анавиларгаям, – шундай дея Ҳожи она четда турган милиционерга ишора қиласи, – атагани бордир...

Хумора опага икки-учта аёл кўмакка келишади.

Улар келинчакни деярли кўтариб қўшни хоналардан бирига олиб киришади.

Ҳамон зўр бериб йифлаётган, ортга, марҳум қуёв томон талпинаётган Моҳидилни Хумора опа уришиб беради:

– Ўзингни бос, деяпман! Унутдингми, бувинг нима дерди: “Оғзинг тўла қон бўлса ҳам душманингнинг олдида тупурма!”. Бўлди! Ўзингни кўлга ол. Хурсанд қилма уларни!

– Ахир, хола... – бўзлаб йифлайди Моҳидил.

– Бўлди, деяпман, – келинчакни уришиб беради Хумора опа. – Бор, бетингни ювиб ол, қара, ҳаммаёғингга бўёқ чаплашиб кетади.

Шундай дея хола келинчакни ваннахонага киритиб юборади. Сўнг, хотиржам тарзда ортга қайтракан, ногоҳ ванна эшигининг ичкаридан “чирқ” этказиб қулфланганини эшитиб қолади ва ўгириласола жон ҳалпида бориб эшикни итаради.

Эшик ичкаридан бекитилган.

Хумора опа эшикни тақиллатади:

– Моҳидил... Моҳидилжон... Оч эшикни, жоним... Санга муҳим бир гапим бор...

Аммо ичкаридан сас чиқмайди.

Хумора опа жон-жаҳди билан қулогини эшикка босади.

Ичкаридан ингараганга ўхшаш товуш эшитилади.

Ваҳимага тушган Хумора опа хона ўртасида серрайиб турган аёлларга қараб қичқириб юборади:

– Тез! Чакиринглар!

Кимни чақириш кераклигини тушунмаган аёллар гарангсиб қолишади.

Хумора опа шартта ўзини бир неча қадам орқага олади ва жон-жаҳди билан келиб ўзини эшикка уради.

Эшик қўпорилиб тушади. Хумора опа эшик билан бирга ичкарига қулайди.

Кенг-мўл ваннахонада, парда ортида келинчак Моҳидил чўзилиб ётибди. Унинг билагидан қон фаввора бўлиб отилмоқда.

– Врачни чакиринглар! – деб бақирганча Хумора опа келинчакнинг билагини маҳкам чанглайди...

Хожи она дод солиб бўзлайди:

– Мусулмонлар! Ўлдиришди! Сўйиши... Дод ёмонларнинг дастидан! Яхшига кун борми ўзи бу замонда?..

* * *

Самолёт салони.

Курсида хотиржам ўтириб кетаётган Омина Асилова ёнига тепакал ёрдамчи Кабиров яқинлашади ва энгashiб, жуда паст овозда нималардир дейди.

Бирдан ранги ўчиб кетган Омина Асилова оғир-оғир нафас олганча ўзи ўтирган курси тутқичини маҳкам чанглайди, инграб юборади:

– Рашидjon...

Сўнг бир амаллаб ўзини тутиб олган Омина Асилова ёрдамчиси Кабировга буюради:

– Қизим билан уланг. Кейин ҳамма одамларимизни оёққа турғазинг. Бизга тегишли кимки бор – ҳаммасини яхшилаб бир силталаб, кўзларини мошдек очиб қўйинглар. Биз бу еб тўймасларнинг киссасини майшат учун, бўкканча еб-ичиб, қусиғига беланиб юрсин учун деб қаппайтириб қўймаётганимизни яхшилаб тушуниб олишсин. Зудликда бу ишнинг бошида турганларни ҳам, унинг ижроҷиларини ҳам аниқлашсин. Ўзимга топширишсин. Акс ҳолда... акс ҳолда нима бўлишини ҳам яхшилаб тушунтириб қўйинглар. Айниқса анави ифлос бор эди-ку...

– Аждаровми? – сўрайди Кабиров. – Ҳарам талаб қилган. Дачасида олтита аёл билан...

– Ўшани қаттиқроқ сиқувга олинглар, – дейди Омина Асилова. – Ўзни уёқ-буёққа ташлагудай бўлса видеозапислар зудликда керакли идораларга юборилишини эслатиб қўйинглар. Хотинларнинг бутининг орасида ётавермасдан қилсан ҳаракатини! Оқласин олганларини!

– Хўп бўлади, – дейди Кабиров.

– Куёвнинг қотилини топганга... олдимга тириклайн олиб келганга... беш юз минг доллар ваъда қилинг, – дейди Асилова.

Кабиров ғимирлаб қолиб дейди:

– Бирданига жуда юқори баҳолаб...

– Сен овозингни ўчириб тур! – жеркиб беради уни Асилова. – Менга бу ишни ким қилганини билиш муҳим. Ҳар қалай, органдан келганлар қилмаганлиги аниқ. Қичидиган жойни олдиндан қашиб қўйиш керак. Ортиқча душманнинг бизга кераги йўқ. Беш юз минг учун эса онасини ҳам сотиб юборишга тайёрлар, бир-бирларининг кекирдагини ғажийдиганлар ҳамиша топилади!.. Бор! Айтганимни қил.

Кабиров:

– Хўп бўлади, – дея салондан чиқиб кетади.

Омина Асилова иллюминаторидан ташқарига, тубсиз зулматга термулиб қолади. Сўнг кўзлари жиққа ёшга тўлади, лаблари титраб кетади. Аёл алам билан пичирлайди:

– Ҳаёт шафқатсиз...

Зим-зиё тун бағрида самолёт учиб кетмоқда.

* * *

Кундуз.

Шаҳардаги маҳаллалардан бири.

Оддийгина уй.

Кичкинагина ҳовлидаги сўрида Ҳулкарнинг бемор онаси Солия хола оғир-оғир нафас олиб ўтирибди. Ҳулкар кичкинагина ошхонада куймаланиб

юрибди. Унинг 6-7 ёшлар чамасидаги синглиси Ҳурматой ҳовлида ўйнаб юрибди.

Шу пайт эшик тақиллади.

Солия хола безовталаниб ошхона томонга қарайди.

– Эшик! – деб қичқиради Ҳурматой.

Олдига пешбанд тутган Ҳулкар ошхонадан илдам чиқиб келади ва бориб эшикни очади.

Остонада шу маҳаллада истиқомат қилувчи, эллик ёшлардаги, чўққи соқол қўйган, бошига оқ дўппи кийган Бадриддин амаки иккита салафан сумка кўтариб турибди.

– Ассалому алайкум, Бадриддин амаки, – дейди қувониб кетган Ҳулкар ўнг қўлини кўксига қўйиб.

– Ваалайкум ассалом, қизим, – дейди Бадриддин амаки.

– Киринг, марҳамат, ичкарига киринг, – дейди Ҳулкар эҳтиром билан йўл бўшатаркан.

– Қалай, холамлар яхшимилар, – дейди Бадриддин амаки ичкарига кираётиб.

– Раҳмат, анча яхшилар, – дейди Ҳулкар.

– Врач келдими? – деб сўрайди Бадриддин амаки.

– Ҳа, келди, – дейди Ҳулкар бош эгиб.

– Нима деди? – деб сўрайди Бадриддин амаки.

– Ё балнисага оборинглар, ё бўлмаса етти-саккиз хил доридан бериб туринглар деб бешта рецепт ёзиб кетди, – дейди хомуш тортиб қолган Ҳулкар.

Бадриддин амаки ўйланиб қолади, сўнг:

– Тушунарли, – дейди. – Дориларининг нархиям осмондир.

Ҳулкар маъюс бош эгади:

– Ҳм...

– Хафа бўлма, бирон нима ўйлаб топармиз, – дейди Бадриддин амаки. Сўнг тўғри Солия хола ўтирган сўри томон юради ва салом беради: – Ассалому алайкум, холажон.

– Вой, Бадриддинжон, бу сизмисиз, – типирчилаб қолади Солия хола.

– Асло безовта бўлманг, – дейди Бадриддин ака илдам келиб. – Бемалол ўтираверинг. Мен бир дақиқага кирдим, холос.

Сўри чеккасидаги кўрпачага ўтириш олдидан Бадриддин амаки ёнига ўгирилиб, Ҳулкарга мурожаат қиласади:

– Қизим, манавиларни олиб қўйинг, – дейди Бадриддин амаки иккита салафан сумкачани қизга тутиб.

Дув қизариб кетган Ҳулкар дейди:

– Амаки... Бизни жуда хижолатга қўяяпсиз. Ўтган сафар ҳам...

– Ол, қизим, ол, – дейди Бадриддин амаки сумкачаларни тутиб. – Асло хижолат бўлма. Ахир неча йиллик маҳалладошмиз. Раҳматли Қодиржон билан яқин эдик. Кўп ёрдами тегган у кишининг бизга. Шундай кунларда бир-биримизга қарашмасак, бу дунёда нима қилиб юрибмиз.

– Раҳмат, – дейди Ҳулкар.

Бадриддин амаки сўри чеккасига ўтиради.

– Илоё умрингиздан барака топинг, – дея қўзларида ёш билан меҳмонни дуо қилади Солия хола. – Яхшиликларингиз биздан қайтмаса, худодан қайтсин.

Учовлон кафтларини юзларига сийпашади.

– Ўзингиз яхши бўлиб қолдингизми, холажон? – дейди Бадриддин амаки Солия холага мурожаат қилиб.

– Раҳмат, анча яхшиман, – дейди Солия хола. – Сизга ўхшаган яхши одамларнинг дуойи жонини қилиб ўтирибман.

– Худо хоҳласа ҳали кўрмагандай бўлиб кетасиз, – дейди Бадриддин амаки.

Ҳовлида ўйнаб юрган Ҳурматой чопқиллаб келиб меҳмонга салом беради:

– Ассалому алайкум.

– Вой асал қизим, новвот қизим! – хурсанд бўлиб кетади Бадриддин амаки ва чўнтағидан битта “чупа-чуп” конфети чиқаради: – Мана бу сизга, жоним қизим.

– Раҳмат, – дейди Ҳурматой.

Ҳулкар салафан сумкачаларни кўтарганча ошхона томон юради.

– Қизим, чой опке, – дейди Солия хола.

– Ҳўп бўлади, ойижон, – дейди Ҳулкар.

– Йўқ, йўқ, – дейди Бадриддин амаки. – Айтдим-ку, жуда шошиб турибман.

– Йўғ-э, уйдан қуруқ оғиз билан чиқасизми? – дейди Солия хола.

– Ҳали тузалиб кетганингиздан кейин бу уйларда бир йўла ўзингиз дамлаган ошдан еймиз деб юрибмиз-да, холажон, – дейди Бадриддин амаки.

Солия хола қўзларига ёш олади:

– Илоё, айтганингиз келсин.

– Насиб, холажон, насиб, – дейди Бадриддин амаки. – Сиз фақат яхши ният қилинг. Ниятинг – йўлдошинг, дейдилар. Худо ҳам яхши ният қилганга беради. Мана биз ҳам яхшиният қилгандик, охири жиянимнинг шарофати билан ўтган йили онамизни муборак ҳаж сафарига юборишга муваффақ бўлдик.

– Умрингиздан барака топинг, савобнинг тагида қолдингиз, – дейди Солия хола.

– Майли, мен борай, – дейди Бадриддин амаки. – Қани, холажон, фотиҳа қилинг.

– Сиздай меҳрибон одамларни етказганига шукр, – меҳмонни алқаб дуо қилади Солия хола. – Илоё фарзандларингизнинг роҳатини кўринг.

Меҳмонни кузатиш учун Ҳулкар ҳам чопқиллаб келади.

Ўрнидан туриб кетишга чоғланаётган маҳал Бадриддин амаки тўсатдан тўхтайди ва дейди:

– Айтгандай. Кеча жияним телефон қилиб қолувди. Покистондаги элчихонамизга беш-олтита ошпаз қиз керак деяётганди. Ҳулкар, қизим, қўлингдан овқат қилиш келадими?

– Вой, қизимнинг қўли ширин, – дейди Солия хола қувонч билан. – Арзимаган масаллиқлардан шундай овқатлар тайёрлайдики...

– Ойижон, – дейди Ҳулкар, – элчихона учун дейишаяпти, элчихона учун.

– Элчихона бўлса нима қипти? – ҳайрон бўлади Солия хола.

– Дипломатлар бизнинг уйда тайёрлаганга ўхшаш овқатларни ейишмайди, ахир, – тушунтиришга уринади Ҳулкар.

– Нима, уларинг одам эмасми, – хафа бўлади Солия хола. – Ош ейишмайдими, манти ейишмайдими, лағмон ейишмайдими...

Бадриддин амаки кулиб юборади:

– Гапингиз тўғри, холажон. Ҳар қандай элчихонанинг овқати ўзимизнинг паловхонтўранинг олдида ип эшолмай қолади. Лекин Ҳулкаройнинг гапи ҳам тўғри. Элчилар ноннинг устига икра суртиб ер эканларми-ей. Ҳуллас, шунаقا алламбалолар. Жиянимнинг айтишига қараганда, бу ердан борган ошпаз қизлар аввал уч ой шогирд бўлиб ишларканлар. Яна денг шогирдлик пайтида ойига минг доллардан пул ҳам бериб туришаркан.

– Қанча дедингиз? – ҳайрат билан сўрайди оғзи очилиб қолган Ҳулкар.

– Ойига минг доллар деди, – дейди Бадриддин ака. – Бу ётоқ жойи ва овқат пулидан ташқари экан. Мустақил иш бошлаганларидан кейин ойлиги яна кўтаришаркан. Лекин қанчага кўтарилишини аниқ айтмади.

– Мен... борсам-чи? – умид билан сўрайди Ҳулкар.

– У ёқларда ишлашни сен эплолмасссан, – дейди Солия хола. – Не-не қизлар бор тегирмонга тушса бутун чиқадиган.

– Нега энди? – дейди Бадриддин амаки. – Нима, Ҳулкарнинг бошқалардан кам жойи борми? Мана, худога шукр, жияним етти йилдан бери чет эл билан ишлайди. Керак пайти бориб-келиб туради, холос. Ўзидан, болаларидан орттириб бизгаям ойига бир-икки минг доллар юбориб туради.

– Зўр экан! – дейди Ҳулкар баттар ҳайратланиб.

– Айтгандай, – дейди Бадриддин амаки, – Райхон мабодо яхши қизлар бўлса, элчихона бир ойлик маошини олдиндан тўлашга ҳам тайёр дегандай бўлганди.

– Буни қаранг-а! – ҳайрат билан хитоб қиласи Ҳулкар.

– Сизлар ўзларингиз бир маслаҳатлашиб кўринглар, – дейди Бадриддин амаки. – Жияним эртага телефон қилиши керак. Балки аллақачон бу ердаги таниш-билишлари орқали ўзига керакли қизларни топиб бўлгандир. Ахир ҳозир ким кўп – чет элга бориб ишлайман, дейдиган қизлар кўп.

– Онам рози бўлсалар, мени бир айтиб кўрасизми, Бадриддин амаки?
– илтижо билан сўрайди Ҳулкар.

– Қизим, – дейди Бадриддин амаки. – Уйингга, онангга ёрдам бермоқчи бўлаётганлигингни тушуниб турибман. Лекин жиянимга бу масалада илтимос қилишим қийин-ов. Ҳар қалай, агар гаплашиб қўйган бўлса, бир қоракўзни ташлаб, ўрнига сени олиб кетиши керак. Бу осон эмасдир...

– Амаки... – кўзларида ёш билан илтижо қиласи Ҳулкар.

– Ҳай, ҳай, – дейди Бадриддин амаки, – дарров кўз ёшингга зўр берма-да. Ҳали холам рози бўлаверсинлар-чи. Балки бир уриниб кўрармиз. Балки омадинг чопиб қолар. Лекин бу сафар кетмай қолсанг ҳам хафа бўлма, айтиб қўяман, келаси сафар яна бир уриниб кўрамиз... Майли, мен борай. Шошиб тургандим.

– Хайр, амаки, яхши боринг, – дея Ҳулкар меҳмонни эшикка қадар кузатиб қўяди.

Эшикни ёпган заҳоти Ҳулкар чопқиллаб онасининг ёнига келади.

– Ойижон!

Солия хола бош чайқайди:

– Яқинда тўйи бўладиган қизга чет элда нима бор, қизим? Эшитган кулқقا яхшимас.

Ҳулкар онасини бағрига босади:

– Ойижон. Айтдим-ку, яқиндамас деб. Акмал акамнинг эллик бир ёшида тўсатдан қазо қилиб қолган тоғаларининг йили фақат ўн бир ойдан кейин бўларкан. Демак ўн бир ой уйда қариқиз бўлиб ўтиришим керакми? Лекин энг муҳими бу эмас, ойижон. Энг муҳими шуки, энг муҳими шуки, ўтган куни Акмал акам Россияга ишга кетдилар. Уларга ойига бир ярим минг доллардан ваъда қилишибди. Кўпи билан ўн ойда қайтаман, дедилар. Кейин данғиллама тўй қиласиз, дедилар. Тасаввур қилинг-а, у киши олиб келган пулга тўй қилсак, мен олиб келган пулга сизни яхшилаб даволатамиз, уйни ремонт қиласиз.

– Ҳали сенга аatab мебел ололганимиз йўқ, – деб юборади беихтиёр Солия хола. – Буни ўйласам кечалари уйқум қочиб кетади.

– Ҳа, ана! – дейди Ҳулкар. – Келишиб, мен ҳам бор-йўғи ўн ойга бориб келаман. Агар ойига мингдан олсам ҳам, эҳ-хе... Олдиндан берадиган минг долларига эса сизга керакли ҳамма дориларни сотиб олардик. Худонинг бизга атагани шу эмасми, ойижон?

Солия хола ўйланиб қолади:

– Четга бораман деган қизлар тиқилиб ётган бўлса сени оладими-йўқми...

– Чиқмаган жондан умид, ойижон, – дейди Ҳулкар. – Бир уриниб кўрайлик-чи... Бунинг устига инглиз тилини билсам... Майлими? Майлими, ойижоним?

Жавоб ўрнига Солия хола қизини қучиб қўяди.

– Ўзимнинг ойижонимдан! – дея Ҳулкар юзини онасининг юзига босади.

Буларни кузатиб турган Ҳурматой билағонлик билан дейди:

– Чет элдан-чи, опажон, менга катта, ўзи гапирадиган, ўзи юрадиган қўғирчоқ олиб келасиз, хўпми? Бўйи мана бундай бўлсин!

Буни эшитган Ҳулкар қулиб юборади ва энди синглисими маҳкам кучоклаб олади.

Солия хола кўз ёшларини артганча опа-сингилга меҳр билан тикилиб қоларкан:

– Бу дунёда Бадриддин амакиларингдай биз камбағалларни ўйлайдиган иймонли, инсофли, мўмин-мусулмон одамлар борлигига минг шукр, – дейди.

* * *

Прокуратура.

Иш кабинетларидан бири.

Терговчи, одам савдосига қарши кураш бўйича маҳсус тезкор-тергов гурух раҳбари Акбарали Олимов хона четида тик турганча варақланадиган ватман қофозидаги чизилган харитадаги турли чизиқларга ва осилган фото суратларга караб раҳбариятга маълумот бермоқда. Юмалоқ стол атрофида ўтирганлар ва юқорида, кабинет тўридаги креслода ўтирган раҳбар Олимовни диққат билан тинглашмоқда.

– ...Энди Асильова Омина бошқараётган уюшган жиноий гурухга келсак, – демоқда терговчи. – Ҳозирча бу гурух тўғрисида қуйидагиларни аниқлашга муваффақ бўлдик. 1993 йилнинг апрель ойи. Асильова Омина Россияга ишлаш учун дея олиб кетаётган ўн иккита аёлнинг ҳар бирини учтадан қорадори солинган салафан пакетчадан ютишга мажбур этади. Йўлда иккита аёлнинг ошқозонидаги халтачалар ёрилиб кетади. Аммо Омина Асильова буни кўра-била туриб врач чақирмайди. Натижада аёллар вафот этади. Қолган ўнта аёлни эса Омина асильова Саратов шахри яқинидаги қишлоққа олиб бориб, ошқозонидаги қорадориларни олгач, ҳар бирини икки минг доллардан “оптом” сотиб юборади. – Олимов куйибишиб гапираётган пайти экранда поезд вагонида кетаётган маҳали ошқозонидаги қорадори солинган пакетчаси ёрилиб кетиб, дўзах азобини бошидан ўтказаётган иккита аёл қиёфаси намоён бўлади. Уларнинг ёнида бир жувон қилт этмасдан, экранга орқа ўтирган қўйи деразадан ташқарига тикилиб турибди. – 1994 йилнинг май ойи. Омина Асильова вилоятлардан келган ўнта бақувват йигитни мардикор бозорида танлаб олади ва Қозоғистонининг Жамбул шаҳрига олиб бориб, ҳар бирини минг доллардан сотиб юборади. У ердаги қурилишда қул каби ишлатилган бу йигитлардан биттаси вафот этади. Майитни олиш учун борган қариндошларидан эса қулдорлар “Биз уни сотиб олгандик. Ҳали қарзи бор эди” деб яна пул талаб қилишади. – Экранда қурилишда қул каби ишлаётган, яъни қурилиш

эгалари ит ушлаб, қамчи кўтариб турган ҳолда ишлатаётган мардикорлар кўринади. Улар озиб-тўзиб кетишган. Аранг лой тўла икки пакирни кўтариб кетаётган йигитлардан бири йиқилиб тушади. – 1994 йилнинг июнь ойи. Омина Асилова икки минг доллар эвазига сотиб хоразмлик аёлнинг қорнида уч ойлик боласи бўлади. Қозоғистон чўлларидағи оғир меҳнат туфайли аёлнинг боласи тушиб қолади, ўзи эса ногиронга айланади. – Эcranда қорни қаппайган ўзбек аёлининг туз конида минг машақкат ила эгилиб ишлаётгани кўрсатилади. – Худди ўша йили Асилова бир ярим минг долларга Россияяга сотиб юборган ўн етти яшар қизни бир бузуқи манъяқ ўзининг шериклари бидан катта ўрмон ичидаги вагонда бир йил қамаб сақлайди, бир йил зўрлайди. Натижада бу қиз ақлдан озиб қолади. – Эcranда нима қоронғулиқдаги вагон бурчагига тиқилиб олган, ваҳима ва қўрқувдан кўзлари катта-катта очилиб кетган, нималарнидир илтижо қилаётган ўн етти яшар қиз. Унинг устига ваҳшиёна қиёфага кирган тўрт эркак бостириб бормоқда. – Булар ҳали ҳолvasи. Фуқаро Асилова айнан 1994 йилдан кейин катта уюшган гурух туза бошлайди. Энди Омина Асилова халқаро майдонга чиқади. Россия, Қозоғистон билан кифояланмасдан Дубайга, Покистонга, Туркияга қиз-жуvonларни, йигитларни улгуржи сотишига ўтади. Эски касали қўзиб, Ҳиндистонга гўёки ишлашга юбораётган одамларни тилла қуймалар ютишига мажбур этади, у ёқдан қайтаётганларни эса ошқозонида бриллиант олиб келишга. – Эcranда юмалоқ тилла қуймаси ютаётган ўзбек

йигитлари. – Арабистонда нафақат дўкон, балки катта фоҳишаҳона ҳам очади. Ўша фоҳишаҳонада бўйсунмас қизларни жазолаш учун зиндан фойдаланади. Зинданда қиз-йигитларни қийнашнинг, азоблашнинг, хўрлашнинг минг бир усуллари ишлатилади. Ҳаттоқи энг қайсар қурбонлар ҳайвонлар орасига ҳам ташланади. – Эcranда ер қазиб ишланган ҳақиқий зинданда мислиз азобларга гирифтор этилаётган қизнинг аянчли кўриниши. – Сўнг бу манзара видеога олиниб, ўжарлик қилганларни бўйсундириш, синдириш воситаси сифатида асралади. Айрим маълумотларга қараганда, Асилова топган катта-катта пулларининг бир қисмини эса бу ерда айрим керакли одамларни сотиб олишга сарфлайди, тасарруфидаги фоҳиshalарни ҳар хафта бир кун “шанбалик” қилишга, яъни ўша керакли одамлар қўйнида текинга ётиб келишга мажбур этади. – Эcranда дипломатда доллар, олтин қуймаси олаётган, фоҳиshalарни эркалаётган галстукли таққан амалдорлар қиёфаси. – Бу ифлосликларни имкон қадар яширин камерада суратга олдиради. Бунинг иложи бўлмаган ҳолларда уларнинг овозларини ёздиртириб олади. Хуллас, Асилова ҳар эҳтимолга қарши оддий участковой милиционердан тортиб судъягача, прокурордан ҳокимга қадар сотиб олишга, тилини қисиқ қилиб қўйишга ҳаракат қиласи. Бунга қисман муваффақ ҳам бўлган. Фикримизча, айнан шу сабабли Асилова устидан узоқ вақт жиноий иш очилмай юрган. Ниҳоят бизга аён бўлган фактлар – булар эса айсбергнинг юқори қисмигина эканлиги аниқ – бош прокурор столига қўйилганини эшитгандан кейингина Асилова дўппи тор келиб қолганлигини тушунадио, чет элда жон сақлаб

юришни маъқул кўради. Шундан кейин Асилова ўз фаолиятини жуда ҳам махфий тарзда олиб боришга ҳаракат қилмоқда. Мазкур уюшган жиной гурухни тўла-тўкис фош этиш учун қўлимиздан келган барча ишни қилмоқдамиз.

– Қўлингиздан келгани ўз оёғи билан тўйга келиб турган Асиловани қочириб юбориш бўлдими? – дейди тўрда ўтирган фуқаро кийимидағи киши жаҳл билан.

– Айборман, – дейди Акбарали Олимов. – Аниқладик, айланма йўллар билан чиқиб кетган. Кейин Қозоғистондан сохта фамилия билан учган.

– Айбдор эканлигинизни тан олганингизни яхши, – дейди раҳбар, – аммо энди бу айбни ювиш ҳам керак. Одамлар норози бўлишяяпти. Қачонгача уч-тўртта нокас, ҳаром пул қутуртирганлар қўнгилларига келган ишни қилиб юраверишади? Яхшилаб уларнинг танобини тортиб қўйиш керак. Токи шаҳар бедарвоза эмаслигини, фуқароларимиз ишончли ҳимояда эканликларини улар билиб-тушуниб олишсин! Операцияни давом эттигринглар!

– Хўп бўлади! – дейди Олимов.

* * *

Эрта тонг.

Қуюқ туман.

Россия шаҳарларидан биридаги темир йўл вокзали.

Ўзбекистондан келган, рюкзак, халта орқалаб олган ўнта йигитни – уларнинг орасида Акмал ҳам бор – машрутли таксига ўхшаш машинага миндиришмоқда.

* * *

Прокуратура.

Терговчи Акбарали Олимовнинг иш кабинети.

Олимов ҳаяжон билан хонада ўёқдан-буёққа бориб келмоқда. Нихоят у соатига қарайди ва компьютер ёнига яқинлашади.

Компьютер ишлаб турибди. Терговчи яна бир соатига қарайди ва компьютер клавиши тугмаларини босади.

Экран ёришади. Бир муддатлик ёниб-ўчишлардан сўнг унда йигирма ёшлардаги сулувгина қизнинг юзи кўринади. Бу Камола. У қулоғига наушник тақиб олган.

– Салом, – дейди томоғи қақраб кетган Олимов энтикиб.

– Акбарали ака, – кўрсаткич бармоғини кўтариб пўписа қиласди Камола. – Конспирация талабларини бузаяпсиз. Ҳали келишилган вақтга уч дақиқаю ўттиз етти сония бор.

– Сабрим чидамади, жоним, – иқрор бўлади Олимов. – Юрагим ҳаприқиб кетаверди. Қаердасиз?

– Бир отелнинг интернет залида, – дейди Камола.

– “Дум” йўқми? – сўрайди Олимов.

– Кўринмади, – дейди Камола. – Умуман бу ерда ҳар жойдан келган менга ўхшаш ченнок аёллар анчагина. Мана, турли тилларда бақиришиб гаплашиб ётишибди.

Камола компьютери экрани тепасидаги митти камерани ён томонларга буради. Залнинг ойналар билан ажратилган кичик-кичик бўлмаларига ўрнатилган компьютерлар қошида бақир-чақир қилиб гаплашаётган турли миллатга мансуб аёллар кўринади.

– Юборган видеоматериалларингизни, фотосуратларингизни олдик. Яна нималарни аниқладингиз? – шошиб сўрайди терговчи.

– Маълумотлар ҳозирча унчалик кўп эмас, – дейди Камола шивирлаб.

– Видеоматериалларнинг бир қисми шаҳардаги хотин-қизлар қамоқхонасидан олинган. Бир маҳаллий аёл билан танишиб қолдим. Унинг бир таниши ўша ерда ишларкан. Тахминимизча, қамоқхонда Ўзбекистондан ноқонуний йўллар билан келган аёлларнинг катта-катта гурухлари сақланади. Ош-овқатлари етарли. Телевизор бор. Эргаш бир-иккита исловатхонага борган. Тасвирлар хира бўлсаям, ўзбек қизлари етарли эканлиги кўриниб тургандир. Эргаш уч-тўрттаси билан гаплашибди. Ўша, ҳамишаги тарих: катта пул тўланадиган ишга деб алдаб олиб келишган. Бу ерда уларни сотиб олганлар қизларнинг паспортларини тортиб олиб кўйишган-да, ўзларини исловатхонага хайдашган...

– Тушунарли, – дейди Олимов.

– Ўлим, ақлдан озиш ҳолатлари кўп, дейишишмоқда. Бу ердаги баъзи мутаассиб эркаклар, очиқ айтишга мажбурман, Акбарали ака, қиз бола учун бир кечага ўн беш минг долларгача тўларкан. Мабодо қиз чиқмай қолса сахрога обориб ўлдириб, қумга кўмиб юборишаркан. Шундай иш қилганлардан биттаси тасодифан қўлга тушиб қолган экан, полициячиларга қараб: “Мен жаннатга тушаман, чунки фоҳишани ўлдирдим” деб мақтанибди. Ўлган қизни туркистонлик дейишшапти. Аммо бу ерда ўзбек, қозоқ, қирғиз қизларининг ҳаммасини “туркистонлик” деб аташини ҳам эсдан чиқармаслик керак.

– Асиева ҳақида бирон нима аниқлай олдиларингми? – деб сўрайди Олимов.

– У очган “Бизнес-ревю” клуби аслида фоҳишалар ва қуллар етказиб берувчи марказ эканлиги ҳақида ишончли маълумотлар топдик. Аммо ичкарига кириш қийин бўляяпти. Уларни чўчитиб қўйишдан ҳам кўрқаяпман. Шунинг учун Эргашни ҳам ҳозирча у ерга юбормай турибман, – дейди Камола.

– Ўзингиз ҳам жуда-жуда эҳтиёт бўлинг, – дейди Олимов.

– Эҳтиёт бўламан, – дейди Камола жилмайиб. – Вақт...

– Бир пасда-я? – дейди Олимов шоша-пиша. – Майли, жоним, эртага келишилган пайтгача. Энг асосийси – эҳтиёт бўлинг. Ўзингизни ўтгаям-чўқаям ураверманг. Келишганимиздай узокроқдан туриб одамлар олиб

бориладиган йўллар, асраладиган жойлар, сотувчилар, олувчилар ҳақида иложи борича кўпроқ маълумот тўплаш керак.

– Бажарамиз, – дейди жилмайиб Камола. – Хўп, эртагача. Сиз ҳам ўзингизни эҳтиёт қилинг, Акбарали ака. Кўринишингиздан анчагина чарчаганга ўхшайсиз.

– Э, мени бу ерда жин уармиди? – дея қўл силтаб қўяди Олимов.

Компьютер экрани пирпирайди ва Камола тасвири йўқолади.

* * *

Россия.

Кундуз.

Ўрмон адогидаги бир қишлоқ.

Ёғоч уйлар.

Ўзбекистондан келган ишчилар жойлашган машина қурилиши чала бир бинонинг ёнида тўхтайди.

Йигитлар тушишгач, машина қайтиб кетади.

Бинодан баҳайбат иккита кучукни ушлаганча чиқиб келган сочини тақир олдирган, керза этик кийган, елкасига милтиқ осиб олган қорувли иккита эркақдан бири:

– А, ну, стройся, черномазие! – дея буйруқ беради.

Баҳайбат кучуклар ириллаб-вовуллаб йигитлар томон ташланишга ҳаракат қилишади.

Қўрқиб кетган йигитлар бир ерга ғуж бўлиб олишади.

– Я так и думал, – дейди бир эркак иккинчисига.

Сўнг эркаклардан бири кучугининг ипини шеригига ушлатади ва ўзи яқин келиб, йигитларга ижирғаниб назар ташлайди.

– Документы! – дея буйруқ беради у.

Йигитлар шоша-пиша ҳужжатларини йиғиб беришади.

Эркак паспортларни ола-була ҳарбий кийими чўнтағига соларкан, дағдаға билан эълон қиласади:

– Так, ребята, теперь слушайте меня внимательно! Постарюсь говорить просто и ясно! Мы вас купили у ваших же земляков. За вас заплатили хорошенъкие бабки! Значить с нами играть не стоить! И не советую! Будете работать хорошо, дадим кушать, не будете хороша работать, подожните как голодные твары! Идите, располагайтесь!

Эркак шундай дея чала бинонинг ертўласини қўрсатади.

Акмал бир қадам олдинга чиқади:

– Но нам обещали совсем другое...

Эркак елкасидаги милтиқни олади ва осмонга ўқ узади.

– Это пока предупредительный выстрел! Следующий раз пулю посажу в твой поганый живот!

Йигитлар шоша-пиша қўрсатилган ертўла томон юришади.

Зах ертўла. Бир чеккада сасиган карам уйилиб ётибди. Каламушларнинг чийиллаши эшитилади. Битта каламуш Акмалнинг олдидан югуриб ўтиб кетади. Бир чеккада титилиб кетган матрацлар.

Кўзойнакли Даврон Акмал томон қарайди ва беҳол тарзда зах ерга ўтириб қоларкан:

– Бизни сотишибди! Қул қилиб сотишибди! Ўзимизникилар сотишибди! Ум! – дея инграб юборади.

Йигитлар лол-ҳайрон, гарангсиган-карахт ҳолларида турган жойларида қотиб қолишади.

* * *

Терговчи Акбарали Олимовнинг иш кабинети.

Олимов тезкор-тергов гурух аъзолари билан Камола юборган видеоёзувларни томоша қилмоқда.

Ҳамма кабинет тўридаги телевизор экранига қараб қолган. Унда Дубай манзаралари, қамоқхона, фоҳиша аёллар. Ўтирганлар дафтарларига нималарнидир ёзиб олишмоқда.

Тўсатдан Олимов:

– Тўхтат! – деб қолади. – Орқага! Орқага!

Ёзув орқага айлантирилади.

Экранда Шарқ бозори. Одам гавжум. Одамлар орасида кетиб бораётган ўн етти-ўн саккиз яшарлар чамаси қизни иккита қалин соқолли, саллали эркак кузатиб кетишимоқда.

– Бу ахир... бу ахир Қувватова-ку! Ноила! – қичқириб юборади Олимов. Сўнг бирдан иккиланиб қолади: – Жудаям ўхшаш! Жудаям! Тўғри, орадан уч йил ўтиб кетган-у, аммо... Орқага айлантир!.. – буйруқ беради Олимов. – Энди тўхтат! Йўқ, сал ўт. Шу ерда. Тўхтат! Мана энди катталаштириш...

Экранда катта-катта кўзларида деярли маъно йўқ жувон пайдо бўлади.

– Жуда ўхшаяпти... – дейди Олимов ўзига ўзи.

Шу пайт кабинет эшиги тақиллайди ва рухсат сўраб ҳам ўтирасдан хонага соқолли журналист Маҳмуд Умаров кириб келади.

– Менинг журналистик олтинчи сезгим бу ерда қизиқ бир нима содир бўлаётганлигидан шоҳидлик бермоқда, – дейди у қувноқлик билан. – Ҳа, видео кўряпсизларми? Менда ҳам сизларга аталган қизиқ бир нарса бор.

– Менга қара, соқол, – дея Олимов журналист томонга ўгирилади.

Умаров сумкасидан китоб чиқаради:

– Сулаймон тоғнинг ёнига бормади, тоғ Сулаймоннинг ёнига келди. Тақдимотга боролмаслигингни билгандим, шунинг учун битта китобимга атай дастхат ёзиб олиб кела қолдим.

– Ў, дўстим! – хитоб қиласи Олимов. – Мутлақо эсимдан чиқиб кетибди.

– Иш кўплигидан Акбарали акам кеча шу ерда тунаганлар, – дейди маҳмадона Шомуродов.

Шу маҳал кабинетга фуқаро кийимидағи икки киши кириб келишади.

– Олимов, – дейди улардан бири совуқ оҳангда. – Марҳамат қилиб биз билан юрсангиз.

Терговчи уларга ҳайрон бўлиб қарайди, сўнг сўрайди:

– Тинчликми?

– Борганда биласиз, – дейди улардан бири. – Аммо, Акбаралижон, яқин танишлигимиз ҳаққи айтиб қўйишим мумкин: сиз мансаб ваколатингизни суиистеъмол қилишда, тўйни бузиб, тўй эгаларига ва меҳмонларига маънавий зарар етказишда ҳамда куёв йигитни ўзини ўзи ўлдирадиган даражага олиб бориша ҳамда айбланаяпсиз.

– Ҳазиллашайпсизларми? – ҳайрон бўлиб сўрайди Олимов.

– Афсуски... – дея қўлларини икки ёнга ёяди иккинчи киши.

Тезкор-тергов гурухи аъзолари ҳайрон бўлиб булар томонга қарапади. Олимов телевизор экранига бир қараб олга, креслосида илиғлиқ турган костюмiga ишора қиласди.

– Қўлларимга киshan солиб олиб кетадиган бўлсаларинг костюмимни кийиб ўтирамай, – дейди Олимов.

– Акбаралижон, – дейди биринчи эркак, – бир идорада ишласак. Уят бўлади.

– Нима бўлаяпти ўзи, ўртоқ? – деб сўрайди Умаров ҳайратланиб.

– Озгина тушунмовчилик, – дейди Олимов. – Асиева суюнган тоғларини ишга колаётганга ўхшайди... Лекин сен бу ҳақда мақола-пақолангда ё интернетдаги чиқишиларингда эслатиб ўтиришни хаёлингга ҳам келтирма. Бир умр гаплашмай қўяман, а... Сен яххиси... – Олимов энгашиб ўзига диққат билан қараб турган икки кишининг кўз олдида қофозга бир нима ёзади. – Манави Камоланинг электрон почтаси. Ҳозироқ хат ёзиб юбор. Акбарали бозорда Ноила Қувватовани кўргандай бўлибди деб. Хўпми? Излаб кўрсин. Зора... – Олимов телевизор томонга ишора қиласди: – Суратини бу ердан оласан.

Олимов тезгина костюмини кияди ва икки киши ҳамроҳлигida чиқиб кетади.

Умаров қўлидаги қофозга ҳайрон бўлиб тикиларкан, терговчининг орқасидан қичқиради:

– Қайси бозордалигини айтмадинг-ку! Чорсудами? Ипподромдами? Қўйлиқдами?

Йўлакдан Олимовнинг овози келади:

– Сен ёзавер. Ўзи тушунади.

Умаров ўлланиб қолади ва стол атрофида ўтирганлар томон ўгирилади ва дейди:

– Йигитлар. Менинг ёзувчилик ҳиссиётим бу ерда қандайдир адолатсизлик рўй берганлигини айтмоқда. Сизларга шундай бўлиб туолмаяпдими?

– Маҳмуд ака, – дейди йигитлардан бири. – Биламиз, сиз яхши журналист, яхши ёзувчисиз. Лекин бу ерда раҳбариятнинг буйруғи муҳокама қилинмайди.

– Чунки раҳбарият ҳеч қачон хато қилмайди, – дейди Шомуродов. Шундан кейин у телевизорга ишора қиласиди: – Суратни ташлаб беришга фleşкенгиз борми?..

– Албатта, албатта, – дея Умаров жажжи сумкачасини кавлай бошлайди. – Ма, ол, маҳмадона Шомуродов.

* * *

Тун.

Аэропорт.

Чипталарни назоратдан ўтказиш залида йигирмага яқин қиз ғуж бўлиб тўпланиб турибди. Улар орасида Ҳулкар ҳам бор. Қизлар ўз ташвишлари билан банд: ким пардоз-андоз билан банд, ким қўл телефонида ким биландир гаплашмоқда. Ора-сира бирон навбатдаги рейс эълон қилиниб қолинади.

Гуруҳ бошлиғи бўлган ўттиз беш-қирқ ёшлардаги аёл – Хумора опа қизларга паспортдаги фамилияларни ўқиган кўйи қизларга паспорт ва чипталарини тарқатиб чиқаяпти:

– Солиева... Одилова... Аҳмаджонова... Сагдиева... Дустбоева...

Ҳулкар қўлига олган заҳоти диққат билан паспорти ва самолёт чиптасини кўздан кечиришга тушади. Ниҳоят у аёлнинг олдига бориб сўрайди:

– Хумора опа. Сиз аввал Дубайга учамиз дегандингиз. Каердадир ўқигандим, Дубайга ўттиз ёшгача бўлган аёллар ёлғиз киритилмайди шекилли.

Хумора опа Ҳулкарга ажабланиб қарайди, сўнг меҳрибонлик билан дейди:

– Вой асалим-ей... Ҳамма нарсага ақлинг етади-я! Билсанг, шунинг учун ҳам биз Украина орқали учаяпмиз-да.

Ҳулкар баттар ажабланиб паспортини кўрсатади:

– Унда нега туристик виза қўйилган?

Хумора опа қизни қучиб олади:

– Йўли шунаقا экан-да, қизим. Ахир баъзан қулоқни бундай ушласа ҳам бўлади-ку. – Хумор опа ўнг қўлини боши узра ўтказиб чап қулоғини ушлаб кўрсатади. – Қизгинам-ей, ахир ҳаммамиз ҳам сабаби тирикчилик деб уч-тўрт доллар илинжида бораяпмиз. Шунинг учун, бунақангич шартларига кўнишга мажбурмиз-да, асалим. Бошида мен ҳам ҳайрон қолардим. Йўқ, мана, сенга ўхшаганларни оборавериб-оборавериб, охири ўрганиб кетдим.

Ҳулкар:

– Барibir ғалати, – деб қўяди.

– Қизлар, юринглар, – дейди Хумора опа ва қизларни эргаштириб энг чеккадаги назорат столи ёнига боради.

Стол ортида аэропорт ходими ўтирибди.

– Бу бизнинг тургрупга, – дейди Хумора опа ва столга қалингина конверт қўяди.

Конвертни кўз илғамас ҳаракат билан столи ғаладонига ташлаган ходим Хумора опа тутган рўйхатни олади ва ғаладонидан муҳрни олгач, ўқий бошлайди:

– Аҳмаджонова...

Бир қиз стол ёнига келади. Ходим унга бир қараб қўйгач, чиптасига муҳр босади ва ичкарига ўтиши мумкинлигини кўрсатади.

Ходим рўйхатни ўқишида давом этади:

– Дустбоева...

* * *

Россия.

Кундуз.

Ўрмон адогидаги бир қишлоқ.

Ёғоч уйлар.

Ўзбекистондан келган ишчилар қурилиши чала бинода ишлашмоқда.

Пишиқ ғиштдан девор тикланмоқда. Озгин йигитларнинг бири цемент қормоқда, биттаси пақирда қийшайиб бетон ташимоқда, иккитаси замбилда ғишт ташимоқда, биттаси ғишт термоқда.

Мардикорларнинг ишини иккита баҳайбат итни ушлаб турган тақир каллали йигит иккита шериги билан шишалардаги пиводан ичганча, сигарета тутатиб кузатиб туришибди.

Мана, замбилни орқа тарафидан тутиб кетаётган озгин, кўзойнакли Даврон ўнқир-чўнқир йўлда сурилиб кетди, сўнг йиқилиб тушади. Атрофга ғишт доналари сочилиб кетади. Шу заҳоти баҳайбат ит вовуллаб Давроннинг бошига елиб келади.

Қўрқиб кетган Даврон жон ҳолатда ўрнидан учиб туради ва сочилган ғиштларни шеригига қўшилиб ғалтакка сола бошлайди. Унинг кўзларида ёш милтирайди.

Ғишт тераётган Акмал буйрагини чанглаб қолади, аммо ит ҳуришини эшитгач, ноилож ишини давом эттиради.

Даврон шериги билан Акмалнинг ёнига келади ва замбилдаги ғиштларни унинг ёнига тера бошлайди.

– Қишлоғимизда бир мақол бор эди, – дейди Даврон инқиллаб. – “Арпа емас отлар ҳам ажриқларга зор бўлди”, деган. Эрталаб ши, кечкурун ши. Абет вообще йўқ. Ачиған карамни еяверганимдан ичакларим қирилиб, совуқлигим ошим кетди. Нуқул кўзимга ўзимизнинг онам пиширадиган қайнокқина, бўрсилдоқ нон кўринади...

– Бизда бўлса бошқа мақол бор эди, – дейди алам билан Акмал. – Ўзга юртда султон бўлгунча...

Шу пайт қўриқчи йигитлардан бири дўқ уради:

– Эй, чучмек! Хватить базар! Давай, работай! Работай!..

Итнинг ваҳимали ариллаши ҳам эшитилади. Афтлари буришиб кетган йигитлар дарҳол иш суръатини тезлаштиришади.

* * *

Шарқ бозори.

Одам гавжум.

Сотувчилар ва харидорлар турли тилларда гаплашишаётгандай. Ўзига хос Бобил.

Аммо тиллар орасида инглизча қўпроқ эшитилади.

Худди хорижга қатнайдиган савдогарлар каби одмигина кийинган Камола чор-атрофга диққат билан қараб юрибди. Қизнинг кўзлари йифидан қизарган.

Камолани туртиб ўтиб кетишади. У йиқилиб кетай дейди, аммо бир амаллаб мувозанатини сақлаб қолади.

Камола бошини кўтаради ва шундайгина қархисидан ўтиб бораётган Ноилани кўриб қолади.

Ноиланинг ортида иккита соқолдор одам. Қиз жуда бепарво, лоқайд. Гўё бозорда эмас, ўз хаёлларига ғарқ бўлган кўйи кимсасиз ерда юргандай.

Камола сездирмасдан уларнинг изидан тушади.

Бир сотув растаси ёнида улар тўхташади. Иккала соқолдор бақир-чақир қилган кўйи сотувчи билан ниманидир савдолашиб кетишади.

Камола аста қизнинг ортидан келади ва:

– Ноила, – деб пичирлайди.

Қиз жуда хотиржамлик билан Камола томонга ўгирилади.

– Ду ю спик инглиш? – деб сўрайди Камола.

Ноила бош чайқайди:

– Нов.

– Ўзбекмисан? – деб ўзбекчалаб сўрайди энди Камола.

– Шунаقا бўлса керак, – дейди қиз. – Ўзбекларга таржимонлик қиласман.

– Отинг нима? – деб сўрайди Камола.

– Гулбадан, – деб жавоб беради Ноила.

Камола афсусланиб бош чайқайди:

– Узр. Мен Ноила исмли қизни излаётгандим.

– Ноила – менинг аввалги исмим, – дейди қиз совуққонлик билан атрофга разм соларкан.

Камола ҳаяжонланиб кетиб:

– Ростданми? – деб сўрайди. – Бўстонликда туғилгансан, а? Сени бундан уч йил бурун куппа-кундуз куни қишлоғингдан ўғирлаб кетишган. Тўғрими? Отангнинг исми Норбой, онангники Латофат. Шундайми?

Қиз бир зум ўйланиб қолади. Нималарнидир эслагандай бўлади. Аммо дарров ҷарчаб кетгандай “уф” тортади ва:

– Шунаقا эди шекилли? – дейди. – Аниқ эслолмаяпман.

– Бу ерга қандай келиб қолгансан? Фақат тезроқ гапир, – дейди Камола.

– Эсимда йўқ, – дейди қиз.

– Бу ерда нима иш қиласан? Фақат таржимонликми? – сўрайди Камола.

– Йўқ, – дейди Ноила. – Бу ерга факат ўзбекларга нарса сотишганларида олиб келишади мени. Бошқа пайтлари у ерда бўламан.

– У еринг қаер? – тушунмайди Камола.

– Кунига камида ўн кишини қабул қилишим керак, – дейди Ноила. – Бўлмаса қарз бўлиб қоламан. Хўжайнинг ҳам жаҳли чиқади. Жаҳли чиқса ёмон уради.

Ранги оқариб кетган Камола беихтиёр қуий лабини тишлайди:

– Вой шўрим! Исловатхонадаман де?

Ноила елка қисади:

– Қанақа аталишини билмайман.

– У ерда ўзбек қизлар кўпми? – сўрайди Камола.

– Кўп, – дейди Ноила. – Биз бир-биримиз билан ўзбекчалаб гаплашамиз.

– Сенларни bemalol шаҳарга чиқараверишадими? – дейди Камола.

– Йўқ. Қочмоқчи бўлганларни боғлаб кўйишади. Шаҳаргаям кўйишмайди. Оч қолдиришади. Қафасга қамаб, устларидан совук сув қуийишади. Ё бўлмаса бир ёқларга олиб кетишади. У ёқлардан ҳали ҳеч ким қайтмаган. Мен ҳали бирон мартаям қочмоқчи бўлмаганман, – дея мақтангандай бўлиб гапиради Ноила. – Шунинг учун менга ишонишади.

– Паспортинг, паспортинг борми? – шоша-пиша сўрайди Камола.

– Йўқ-да, – дейди Ноила алам билан. – Ҳеч нимам йўқ.

– Дарвоқе, сени ўн тўрт ёшингда... Оз-моз бўлсаям уйингни эслай оласанми? – яна сўрайди Камола.

Ноила бир лаҳза ўйланиб қолади. Сўнг ширин тамшаниб дейди:

– Боққа чиқиб... довучча еганим эсимда. Тишларим қамашиб кетганди. Қачон шуни эсласам оғзимнинг суви келади... Яна бир мартагина есам эди...

– Дугоналаринг-чи, уларни эслайсанми? – дейди Камола.

– Сал-пал, – дейди Ноила. – Ҳалима дегани бўларди. Ўзи қоп-қора эди. Катта сумка кўтариб юради. Бир куни оқшом ухлаб ётсам, келиб кўзимга сумалак суртиб кетган. Роса кўзимни очолмай қийналганман... Ўзи сумалакни жуда яхши кўрардим. Яна бир марта татиб кўрсам эди... Яна бир дугонам...

– Бўлди! – дейди Камола. – Юр, мен сени довучча ейишга олиб бораман. Фақат орқангга қарамайсан!

Камола атрофга аланглайди. Икки соқолдор ҳамон бақириб-чақириб сотувчи билан савдолашишмоқда.

Камола Ноиланинг қўлидан маҳкам ушлайди ва шиддат билан олдинга интилади. Улар оломон орасини ёриб ўтиб боришади.

Шу пайт соқолдорлардан бири бақиришдан чарчаб, ҳозиргина Ноила турган жойга қарайди. Ноила жойида йўқ. Соқолдор сотувчига ҳамон бақириб-чақираётган шеригига бир нима дейди ва узоқда, одамлар орасида чопиб кетаётган Камола билан Ноилани кўрсатади. Ҳар иккаласи Камола билан Ноила ортидан чопишади. Сотувчи улар ортидан бир нималарни бақириб қолади.

Чопиб бораётган маҳал Камола ортига ўгирилиб қарайди ва жонжахди билан югуриб, йўлдаги одамларни туртиб-йиқитиб кетаётган иккала соқолдорнинг тобора яқинлашиб келаётганини кўради.

Камола бозор тугаб, йўл бошланганини кўради. У югуриб чиқиб дуч келган биринчи таксини тўхтатади ва орқа эшикни очиб, шахт билан Ноилани ўтиргизиб, ёнига ўзини ташларкан, ҳали эшикни ёпмасидан бурун ҳарсиллаган кўйи ёшгина ҳайдовчига инглиз тилида дейди:

– Ўзбекистон элчиҳонасиға! Ўн дақиқада етказиб борсангиз икки юз доллар бераман!

Такси чийиллаб олдинга интилади.

Камола орт ойнадан қараб, кўчага чопиб чиққан икки соқолдор кейинги таксини тўхтатаётганини кўради.

Шаҳар қўчаларида Камола билан Ноила ўтирган таксининг физиллаб кетаётгани намойиш қилинади. Уларнинг ортида ғазаб билан бақириб-чақираётган, ойнадан бошини чиқариб, қўлларини мушт қилиб силкитаётган икки соқолдор кейинги таксида келишмоқда.

Олдинги катта йўл чораҳасига ўрнатилган светофорнинг сарик чироги ёниб қолади.

– Улгурасиз! Ўтиб кетамиз! – дейди Камола.

Ҳайдовчи йигит газни босади.

Дарҳақиқат, такси бир амаллаб, чорраҳадан чиқиб келган катта юк машинасиға урилай-урилай дея ўтиб кетади. Ортдан келаётган соқолдорлар таксиси эса ноилож чийиллаб тормоз бериб тўхтайди. Соқолдорлар алам билан муштларини ўқталганча бақириб-чақириб қолаверадилар.

Панжара билан ўралган чиройли бино. Унинг тепасида Ўзбекистон байроби хилпираб турибди.

Бино ёнига такси машинаси келиб тўхтайди.

Ундан отилиб тушган Камола Ноилани судраклаган кўйи очиқ дарвоза томон чопаркан, чўнтагидан паспортини чиқариб инглиз тилида бақиради:

– Биз Ўзбекистон фуқароларимиз! Биз Ўзбекистон фуқароларимиз! Ёрдам беринг!

Икковлон очиқ дарвозадан ўтиб олишади.

Шуни кутиб тургандай, уларнинг ортидан дарвоза тавақалари автоматик тарзда ёпилади.

“Уф” дея оғир сўлиш олган Камола қучоғини очиб, Ноилани қучоқлаб олади ва кўзларида ёш билан:

– Она-юртингга қайтаётганинг чин бўлсин, сингилжон, – дейди.

* * *

Хорижий мамлакатлардан бири.

Ғарибина меҳмонхона.

Ўзбекистондан келган йигирмага яқин қиз каттагина залда қалдирғочдай тизилишиб туришибди.

Бадриддин амакининг жияни, Омина Асилованинг қизи Райхон Хумора опа билан биргаликда уларни синчиклаб кўздан ўтказмоқда.

– Кўшиқ айтишга, рақс тушишга уқуви борлар чап тарафга ўтсин, – дейди у.

Тўртта қиз чап тарафга ўтади.

– Санлар стриптиз-барларга борасанлар, – дейди Райхон уларга қараб.

– Энди, хонимчалар, – дея Райхон қолган қизларга ўгирилади, – алдам-қалдам қилмасдан ҳақиқатан ҳам қиз болаларинг ўнг тарафга ўтинглар. Айтиб қўяй, ҳар биттангни дўхтирга текширириб кўраман. Бу масалада меничув тушираман деб хомтама бўлманглар. Хўш, қайси бирларингга ҳали эркак кўли тегмаган?

– Бунинг... бунинг нима кераги бор, опа? – ҳайрон бўлиб сўрайди Ҳулкар.

– Бунинг санга кераги бўлмаса манга кераги бор, – дейди Райхон жаҳл билан.

– Қанақанги стриптиз-барларни айтаяпсиз? – баттар ҳайрон бўлади Ҳилола. – Ахир Бадриддин амаким бизга Покистондаги элчинонамиизда ошпаз бўласанлар дегандилар.

– Кечириб қўядилар, элчинонамиизда санларга аталган бўш вакант ўринлар қолмапти, – мазахомуз оҳангда гапиради Райхон. Сўнг жаҳл билан қўшиб қўяди: – Ҳой, олифта, сан ўзи бир нарсани тушуниб, чумчуқмиянгга қуиб ол? Сан энди Ўзбекистонда эмассан. Бу ерга ҳам виза-пизасиз, қочқинчи-ўғриларга ўхшаб кириб келгансан. Бу ерга келиш осон, кетиш эса жуда-жуда қийин. Ёқмаяптими? Кетмоқчимисан? Марҳамат! Лекин энг аввало уйингдагиларга биринчи ойлигим деб шиқирлатиб санаб берган минг долларни қайтариб қўясан! Кейин самолёт билети пули. Унга бер, бунга бер, Ейиш-ичишинг. Хуллас, то шу ерга қадар етиб келгунларингча ҳар бирингга уч яrim минг доллардан сарфладим. Марҳамат, шу пулни тўлаб қўй. Шу билан орамиз очик. Кейин тўрт томонинг қибла. Шунаقا боймисан? Тўла! Лекин билиб қўй, ҳаттоқи Тошкентдаги валломатларинг бунча пулни тўлаган тақдирда ҳам Ўзбекистонга ҳали-бери етиб боролмайсан. Чунки кўчага чиқдинг, бўлди: полиция ушлайди. Санда бўлса виза йўқ. Жарима тўлашинг керакми, керак! Пулинг борми? Йўқ. Демак, нима қилишади? Қамоқхонага обориб тиқиб қўйишади. Ана у ерда онангни кўрасан! Дунёга келганларингга пушаймон бўласан.

– Демак сиз бизни... – дея гапиролмай қолади кўзлари даҳшатдан катта-катта очилиб кетган Ҳулкар.

– Жа ўзингни моҳпора ойимқиз қилиб кўрсатаверма, – дейди Райхон.
– Ёш бола эмассан, бу ерларда санга ўхшаган қўлбола ошпазларга бироннинг кўзи учиб тургани йўқлигини ўзинг ҳам билиб турган бўлсанг керак. Санга очиқ айтаяпман. Агар чиндан ҳам бор бўлса ўша матаҳинг бу ерда қадрланади. Пулнинг сассифига чидай олмай, томи кетиб қолган бир хил эркаклар учун ўн-ўн беш минг доллар ҳеч гап эмас. Зато агар келишиб ишласак, сан ҳам бир нималик бўлиб қоласан. Агар келишмасак, ит кунини бошингга соламан! Ўлигинг саҳрода, юз тонна қум остида қолиб кетади. Бир кун бориб суюкларингни шамол сочиб юборади.

– Лекин Бадриддин амаким... – эътиroz билдиришга уринади Ҳулкар.
– Махалладош... Онамларни, адамларни яхши танийдилар...

– Тоғамларни тинч қўй, ўртага суқаверма! – дейди Райхон.

Ҳулкар изиллаб йиғлаб юборади:

– Бу кунимдан кўра... ўлганим яхши.

Райхон пинақ бузмайди:

– Ўлгинг келаётган бўлса – ўласан!

Райхоннинг ёнида турган Хумора опа пилдираб келиб, Ҳулкарни кучиб оларкан, уни юпатади:

– Қўй, қизим, асалим, куйинаверма. Юрагимни эзиб юбординг-ку. Бу дунёда ўлимдан бошқа ҳамма нарсанинг иложи бор. Агар бунақа иш қилгинг келмаётган бўлса, майли, бошқа бир нарса ўйлаб топармиз. Факат унда иш ҳақинг кам бўлади-да. Ахир турар жойинг, еяр-ичаринг учун тўлашинг керак. Унда уйгаям пулсиз қайтишингга тўғри келади.

– Майли, опажон, майли, – ҳиқиллайди Ҳулкар. – Оч қолсам ҳам майли, яланғоч қолсам ҳам майли, лекин бунафа ифлос иш билан шугулланмайман. Уйга бир тийинсиз қайтсам қайтаманки...

– Бўлди, қизим, бўлди, – дея Ҳулкарни юпатади Хумора опа. – Айтдим-ку бир йўлини қиласиз деб. Ма, – Хумора опа столда турган графиннинг тагида қолган бир чашка сувни қуйиб олиб, Ҳулкарга узатади, – сув ичиб, сал ўзингга келиб ол. Қолган гапларни кейин иккаламиз гаплашамиз. Балки эртага бирга қайтиб кетармиз.

– Кетамиз, опажон, кетамиз! – дейди жон ҳолатда Ҳулкар. – Мен Тошкентга боргандан ҳамма пулингизни тўлайман. Керак бўлса уйимизни сотиб бўлса ҳам тўлайман. Ошиғи билан тўлайман.

– Манга ошиқчаси керак эмас. Уйда сан тенгги қизим бор. – дейди Хумора опа. – Ма, ич, ўзингни босиб ол.

Қўрқув ва даҳшатдан тишлари такиллаётган Ҳулкар бир амаллаб тўкиб-сочиб сувни ичади ва ногоҳ кўзлари олайиб, Хумора опанинг қўлига ийқилади.

Хумора опа жаҳл билан Ҳулкарни полга ётқизиб қўяди.

– Ҳа, графиндаги уйқу дориси солинган сув тугади, – дейди Райхон қизлар томон ўгирилиб. – Бу энг енгил жазо усули эди. Бошқалари қандай

бўлишини синаб кўришни санларга маслаҳат бермайман. Жуда қизиққанлар бўлса, Хумора опаларингга айтсаларинг, видео қўйиб беради. Факат хушдан кетиб қолмасаларинг бўлди... Хўш, яна ўша масалага қайтамиз. Ораларингда кимнинг ҳали кўзи очилмаган бўлса ўнг томонга ўтсин!

Бештacha қиз ўнг томонга ўтишади...

* * *

Иш кабинети.

Тўрда прокурор кийимидағи Эшонов ўтирибди.

Унинг қаршисида ўринбосари.

Прокурор Эшонов викор билан гапирмокда, ўринбосари ихлос билан блокнотига бир нималарни ёзиб олмоқда:

– Тасаввур қилинг-а, у тўйга тезкор-тергов гурухи ва спецназ билан бостириб борган! Тўйга-я! Одамларда ваҳима, қўрқув уйғотган! Тўйхонанинг ўзида сўроқ қилиш бошлаб юборилган. Натижада жуда қаттиқ руҳий зарба олган бечора куёв йигит ўзини осиб қўйган. Ўз тўйида-я! Келинчак эса венасини кесган! Яхшиям уни сақлаб қолишибди! Демак, айнан бизнинг ходим Акбарали Олимов бир инсоннинг ўлимига, қанчадан-қанча одамларнинг қалби жароҳатланишига, ҳуқуқни ҳимоя қилиш органлари вакилларига нисбатан нотўғри хулосаларга боришига бевосита ва билвосита айбдор! Биз мисқоллаб обрў йигамиз, Олимовга ўхшаганлар ботмонлаб сочишади. Шунинг учун ҳам мен Олимовнинг дарҳол ишдан бўшатилишини ва қаттиқ жазо олишини талаб қиляпман. Қонун талабига кўра унинг устидан жиноий иш қўзғатинг. Уч-тўрт йил ўтириб чиқса кўзи мошдек очилади. Токи ўзбошимчалик нималарга олиб боришини бошқалар ҳам билиб қўйишсин. Тушундингизми?

– Тушундим, – дейди ўринбосар.

– Бу ишни шахсан ўз назоратингизга олинг, – дейди Эшонов.

– Ҳўп бўлади, – дейди ўринбосар.

– Ҳозир ўзи ҳибсдами? – дейди Эшонов.

– Ҳа, – дейди ўринбосар ва шаҳд билан ўрнидан туради: – Кетишга рухсат этинг.

– Рухсат, – дейди Эшонов.

Ўринбосар чиқиб кетади.

Прокурор Эшонов қўйин чўнтагидан қўл телефонини чиқаради ва рақамларни тера бошлайди.

* * *

Тонг.

Тошкент.

Маҳалла.

Журналист Маҳмуд Умаровнинг иш кабинети.

Умаров компьютер экранига тикилиб турибди.

– Та-ак, – дейди у ўзича. – Ўн еттинчи хат. Яна ўша гап: “Акбарали акамга нима бўлди?” Э, Камолаҳон, нима бўлганини билсам эди...

Эшик қўнғироғи жиринглайди.

Сўнг кабинетга прокуратура ходими Шомуродов кириб келади.

– Ҳа, Маҳмуд ака, дачангизда ётиб олиб, эрталабдан биз фақирларни йўқлаб қолибсиз. Ассалому алайкум, – дейди у. – Ё бирга нонушта қилмоқчимисиз!

– Ваалайкум ассалом, – дейди Умаров. – Акбарали ҳақида бирон янгилик борми?

– Э, яхши гап йўқ, ака, – дейди куйиниб Шомуродов. – Иш шахсан Эшоновнинг назорати остида эмиш. У эса куёвнинг ўлимидаги Акбарали акани айблаётган экан...

– Лекин тўйда Интерпол иккита хавфли жиноятчини ушлаб кетди-ку, бу нега эътиборга олинмаяпти? – ҳайрон бўлади Умаров.

– Бу бошқа таркибининг муваффақияти экан, бизга тегишли эмас, – дейди Шомуродов. – Хўш, мени гонорар тўланмайдиган шу икки оғиз интервью учун чақирганмидингиз? Ё кабинетингиз билан мақтанмоқчи бўлдингизми?

– Сенинг билмаган нарсанг йўқ, Шомуродов, – дейди Умаров. – Шунинг учун иккита савол бермоқчиман. Фақат менга аниқ жавоблар керак.

– Қўлимдан келганча, ака, – дейди Шомуродов.

– Қўлингдан келади сен боланинг. Гапнинг қисқаси, биринчи савол: яқиндагина милиция академиясини битирган Камола чет элда нима қилиб юрибди?

– Тан оламан: ўлимдан хабарим йўқ, лекин бундан хабарим йўқ, – дейди Шомуродов. – Лекин ўйнагани бормаган деб ўйлаймаймн.

– Ғоят мантиқий фикрладинг, шунисига ҳам раҳмат, – дейди Умаров.

– Энди иккинчи савол: манави одамни танийсанми?

Умаров компьютер экранига ишора қилиб, клавиатурадаги бир тугмачани босади.

Экранда чандиқли кишининг юзи кўринади.

Шомуродов суратга диққат билан тикилади ва:

– Ким бу? – деб сўрайди.

Ҳафсаласи пир бўлган Умаров:

– Майли, маҳмадона, ишингга борақол, – дейди. – Тағин кечикиб қолиб гап эшитиб юрганинг. Ё такси пули берайми?

– Ёмон бўлмасди, – дейди Шомуродов. – Бир йўла тушлик пули ҳам бўлса янада яхши бўларди... Лекин мендан бекорга хафа бўляяпсиз. Ахир мен Ўзбекистондаги йигирма етти миллион кишининг ҳаммасини таниш кафолатини зижмамга олмаганман-ку! Бу одамнинг ҳам қаериидир менга таниш қўринаяпти-ю, лекин маълумотлар банкимда, – шундай дея Шомуродов миасига уриб-уриб қўяди, – ҳеч нима йўқ.

– Акбарали одам савдосига қарши кураш олиб борувчи гурухга раҳбар бўлганидан бери бу одамга уч-тўрт марта кўзим тушгандай, – дейди

Шомуродовга учта минг сўмлик санаб бераётган Умаров. – Шу атрофда аралашиб юрадими-ей. Охирги марта уни Асилованинг тўйида ўтирган меҳмонлар қаторида видеога тушириб олган эканман. Бу башарани, бу чандиқни яна қаердадаир кўргандайман. Жуда таниш. Фақат қаериdir бошқачароқ эди-да. Кўзими, қошими, сочими...

Пулни яхшилаб тахлаб, чўнтағига соглан Шомуродов эшик томон юра бошлаган маҳал шартта тўхтайди ва пешонасига шапатилаб уради.

– Э, хомкалла! – дейди у афсус билан.

– Фоят оқилона эътироф! – дейди Умаров ачитиб.

– Айтдим-а, қаериdir таниш кўринаяпти деб, – дейди жойига қайтган Шомуродов. – Қани, сочини оқартилинг-чи... Келинг, менга берақолинг. Бу сизга ўтировлиб роман тўкиш эмас. “Фотошоп” деган программани билиш керак, программани.

Шомуродов клавиатуруни чаққонлик билан ишлатиб суратдаги одамнинг сочини оқартиради. Сўнг, суратга бир лаҳза дикқат билан тикилиб тургач, ўзининг сонига шапатилаб юборади.

– Ўзи, худди ўзи! – дейди у қийқириб.

– Хавфли жиноятчими? – хавотирланиб сўрайди Умаров.

– Қанақа жиноятчи? Жиноятчиларнинг уруғини қуритадиганлардан бу одам! – фахр билан гапиради Шомуродов. – Прокурор! Каминанинг ҳамкасби!

– Энди талтаймасдан тушунтириброқ гапир, барака топгур, – дейди Умаров. – Гонорарингни олдиндан бериб қўйган бўлсанм.

– Э, бу одам ҳақида мен гонорарсиз ҳам соатлаб гапиришим мумкин, – дейди Шомуродов.

– Фақат ортиқча лирик чекинишларсиз ва тафсилотларсиз, – дейди Умаров. – Бир гапга тушиб кетсанг тўхтатиб бўлмайди сен болани.

– Шошиб тургандим-да, бўлмаса-ку... – дейди Шомуродов афсусланиб. – Хуллас, бу киши Каримжон Мухторов бўладилар. Бундан ўн йилча бурун вилоят прокурори бўлиб ишлаган. Ана ўша пайтлари биринчилардан бўлиб одам савдосига, фоҳишабозликка қарши астойдил курашганлардан. Ўзиниям тун-кун тиним билмаган дейишади. Чамадон-чамадон доллар, тилла ваъда қилишсаям сотилмаган. Шунда душманлари у кишининг ўн олти яшар ёлғиз қизини ўғирлаб кетишган. Хуллас, шантаж қилмоқчи бўлишган-да. Мухторов кўнмагач, қизни зўрлаб... Ўшанда бир оқшомда Мухторовнинг қоп-қора соchlари қордай оқариб кетган дейишади. Фарзанд доғи ёмон бўларкан... Шундан кейин Мухторов бутунлай ўзини бошқара олмай қолган. Ўзидан қўрқсанми, дарҳол пенсияга чиқиб кетган. Аммо қизининг қотилларини ҳалиям қидиради дейишади. Бир тунда эса учтўртта қўшмачи сутенёрларга қарши қарши якка ўзи олишувга чиқсан деган гаплар ҳам бор. Юзидаги чандиқ ўшандан қолган экан. Лекин нима учун тўйга сочини бўяб борганини ўлай агар тушунмадим. Ҳар қалай, аёлларга ёқиши учун бўлмаса керак.

– Балки қизининг қотилларининг изига тушгандир, – тахмин қиласи Умаров.

– Балки, – дейди Шомуродов. Сўнг компьюердаги соатга эгилиб қараб қўйгач, ўрнидан туради. – Хўп, мен борай бўлмаса.

– Катта раҳмат, маҳмадона Шомуродов, – дейди Умаров миннатдор бўлиб. – Сенинг калланг калла эмас, компьютер.

– Бу бошқа гап, – дейди Шомуродов шошиб кабинетдан чикиб кетаркан.

Умаров эса компьютердаги чандиқли одам юзига узоқ тикилиб қолади.

* * *

Экранда чандиқли одамнинг юзи.

Сочлари оппоқ бу одам ҳибсдаги одамлар билан учрашув хонасида ўтирибди.

Унинг қаршиисига, ойнанинг бу тарафига терговчи Акбарали Олимов келиб ўтиради.

– Қаттиқ ишляяпсиз шекилли? – дейди собиқ прокурор Мухторов истехゾ билан.

– Кўлдан келганча, Каримжон ака, – дейди Олимов бир амаллаб жилмайишга уринаркан.

– Кўриниб турибди, – дейди Мухторов. Сўнг жиддий равишда давом этади: – Сизнинг бу аҳволда ўтирганлигингиз мен умрим охирида кашф этган хулосани яна бир бор тасдиқлади: бундай жиноятчиларга қарши қонун доирасида курашиб бўлмайди.

– Мен эса барибир қонун ва фақат қонун устунлиги тарафдориман, – дейди Олимов. – Ўзимга келсак, қандайдир бир тушумовчилик юз берган деб ўйлайман. Тез орада ҳаммаси изга тушиб кетади. Ҳар битта бунақангি хусусий ҳол учун қонундан юз ўғираверсак, ўзимиз анархияни, Линч судини бошлаб берган бўлмайизми?

– Уларнинг кўчадаги қутурган кўппаклардан фарқи йўқ, – дейди Мухторов. – Наҳотки шунақаларга ҳам қонуний муносабатда бўлиш тарафдорисиз? Ҳалиям, а?

– Шунинг учун ҳам қонунни ҳаммага баробар деймиз-да! У олдиндан бировни оқ, бировни қора деб ажратиб ўтиrmайди, – дейди Олимов.

– Мен эса ажратиб бўлдим, – дейди Мухторов. – Ва ўзимнинг қонли ўйинимни бошладим. Бу жараёнда сизнинг азият чекканлигингиздан хижолатдаман. Аммо вақти келиб, ҳаммаси тугагач, керак бўлса бош прокурорнинг қабулига кириб, барисини тушунтираман, айбларимни бўйнимга оламан.

– Демак, куёвнинг тўсатдан ўзини осиб қўйиши... – дейди сергак тортган Олимов.

– Мен қизимнинг, норасида гўдагимнинг қотилларини топдим, – дейди овози титраб кетган Мухторов қўйин чўнтагидан 16 ёшлар

чамасидаги қизнинг қулиб тушган суратини олиб кўрсатаркан. – Ўша тўй оқшоми халақит бермаганигизда эди... Ахир қизимнинг айби нима эди? Жигарбандим дунёга келиб нима кўрди? Энди яшай бошлаганида... мени деб...

Мухторовнинг бутун вужуди титраб кетади, кўзларидан шашқатор ёш оқади.

– Худо сизга сабр берсин, – дейди Олимов. – Аммо барибир сизнинг ўч олишга киришишганингизни оқламайман. Қонга – қон, жонга – жон принципи ҳеч қачон ўзини оқламаган.

– Менинг яшагим келмайди, укажон... – инграб юборади Мухторов. – Айниқса узун тунлари ёлғиз эркатойимнинг ўлимида ўзим айбдор эканлигимни ўйлаганимда. Уни қандай ўлдиришганларини ўйлаганимда... Мен сизга сабр-тоқат тилайман, – дейди кўз ёшларини артиб олган Мухторов. – Ҳозирча сизга ёрдам беролмайман. Хайр. Яхши кунларда кўришгунча. Агар... кўришолмай қолсак, мени ёмон гаплар билан эсламанг.

– Каримжон aka! – дейди Олимов.

Аммо Мухторов бир сўз демасдан ўрнидан туради ва хонадан чайқалиб юрганча чиқиб кетади.

Олимовнинг орқасида милиционер пайдо бўлади.

* * *

Кундуз.

Қишлоқ.

Ҳовли.

Дараҳтлар қийғос гуллаган.

Ноиланинг ота-онаси Норбой тоға билан Латофат хола сўрида ўтиришибди.

Ноиланинг ўзи у дараҳтдан бу дараҳтга чопиб юрибди. У худди ўн тўрт яшар қизча каби қувонч оғушида, қиқирлаб қулади.

Букчайиб қолган Латофат хола ердан кўз узмайди. Аёл ўз хаёллари билан банд. Аммо тез-тез ичаклари оғзидан чиқиб етадигандек кучаниб-қийналиб йўталади, қадди баттар эгилиб қолади.

Норбой тоға дикқат билан ҳам рафиқасини, ҳам қизини кузатиб ўтирибди.

– Ойи, дада, – дея қичқиради ногаҳон шодон овозда Ноила. – Довучча еявериб тишларим қамашиб кетди.

– Бемалол еявер, – дейди Норбой тоға.

Бу гапни эшитган Латофат хола кескин бошини кўтаради, шошиб ўрнидан туради, илдам юриб дараҳтлар ёнига келади ва қизининг юзига, қорнига диққат билан термулади. Дарҳақиқат, Ноиланинг юзига доғ тошган, қорни эса сезиларли даражада қаппайиб қолган.

– Вой шўрим! – дея Латофат хола юзини чангллаганча ўтириб қолади. Бу нидо узоқ давом этган йўталга қўшилиб кетади.

Аммо қувончдан боши осмонда Ноила бунга эътибор берадиган ҳолатда эмас. У ҳамон у дараҳтдан бу дараҳтга чопиб юрибди.

Норбой тоға хотини ёнига яқинлашади.

Юм-юм йиғлаётган Латофат хола яна йўтал тутгани боис гапиролмайди, аммо зўр бериб қизи томонга ишора қиласди.

– Биламан, хотин, биламан, – дейди Норбой тоға изтироб билан. – Элчиҳонада ҳам, бу ерда ҳам дўхтирлар текшириб кўришган экан. Иккинчи ҳомиласи экан. Аввал биттасини олдириб ташлашган экан... Ишқилиб, эсон-омон...

Латофат холанинг йиғиси ҳам, йўтали ҳам кучаяди.

Аммо бу йиғи ва йўтални Ноиланинг шодон кулгуси босиб кетади...

* * *

Оқшом.

Хорижий давлат.

Исловатхона.

Хонани қизил чироқ хира ёритиб турибди.

Тўрда икки кишилик диван.

Ўртада егуликлар ва ичимликлар қўйилган юмалоқ стол, иккита кресло.

Деворда ярим яланғоч аёлларнинг суратлари.

Тўшак чеккасида забун ҳолатда калтароқ, ёқаси ўйикроқ кўйлак кийган Ҳулкар ўтирибди.

Эшик очилади.

Сесканиб кетган Ҳулкар учиб ўрнидан туради.

Хонага соқолдор бир эркак кириб келади.

Эркакнинг эшик орқасидаги илгичга камзулини илаётганини кўрган Ҳулкар унга инглиз тилида мурожаат қиласди:

– Илтимос, менга тегманг. Ахир сизнинг ҳам қизингиз, синглингиз бордир...

Бунга жавобан эркак инглиз тилида дўқ уради:

– Мен пули тўланган нарсамни шундай ташлаб кетадиган аҳмоқка ўхшайманми? Ноз қилмасдан ечин...

Ҳулкар жон ҳолатда чироқ тугмачасини босади. Хона қоронғулик оғушида қолади.

* * *

Чегарага яқин қишлоқлардан бири.

Тун. Яккам-дуккам уйлар кўзга ташланади.

Чигирткалар чириллаши, қурбақаларнинг қуриллаши эшитилади.

Осмонда тўлин ой.

Энг чеккадаги одмигина хонадон.

Каттагина хона тўрида Омина Асилова тепакал ёрдамчиси Кабиров билан ўтирибди. Уларнинг ёнидаги столда каттагина пичок. Пойгақдаги стулда собиқ прокурор Каримжон Мухторов.

Омина Асилова Мухторовга хотиржам тарзда қараб турибди.

– Пискангиз Асилова шу ерда деса, бир нарсадан қуруқ қолган одамдай лўкиллаб келаверибсиз-да, жаноб собиқ прокурор, – дейди у. Сўнг столдаги пичоққа ишора қиласди: – Яна совууқ қурол билан-а!.. Нақадар эҳтиётсизлик! Айниқса сиздай одам учун!

– Мен сенинг олдингга қизимнинг хунини талаб қилиб келдим! – дейди Мухторов аёлга тик боқиб.

Асилова курсига ўтиради ва оғир уф тортиб қўяркан:

– Хўш, қизингизнинг хунини қанчага баҳоладингиз? – деб сўрайди.

– Қонга – қон, жонга – жон! – дейди Мухторов.

– Сиз шундай оҳангда гапирайпизки, гўё мен атай бориб, қизингизни ўлдириб келгандай, – хотиржам жавоб қайтаради Асилова. – Майли, ҳаммасини аниқлаган экансиз, очигига кўча қолай. Аслида эса мен бир пўписа қилиб қўйишни топширгандим, холос. Йигитлар ҳаддидан ошиб кетишибди. Уларни албатта ўша пайтидаёқ жазолаганман.

– Бу чўпчакларингнинг менга бир чақалик аҳамияти йўқ, – дейди Мухторов. – Мен аллақачон қарор қабул қилиб бўлганман.

– Ҳаёт шафқатсиз, жаноб прокурор, – дейди Асилова. – Сизга ўхшаган бузоқларнинг юргани эса...

– Лекин менинг ҳаётимни сен дўзахга айлантирединг, сен! – дейди Мухторов.

– Чунки ундан олдинроқ кимлардир менинг ҳаётимни дўзахга айлантириб улгуришганди, менинг ҳаётимни! – дея бақириб юборади Асилова. – Мен одамлардан нима олган бўлсам, ўзларига ўшани қайтардим, холос. Бунинг устига, тўй кечаси куёвимни осиб кетганларида ҳар қалай ўзим омон қолдим дея қарсак чалиб ўтиргандирман. Бу ишда сизнинг қўлингиз бўлиши мумкинлигини эса дарров фахмлаганман. Лекин индамадим-ку. Бориб куёвим учун хун талаб қилиб ўтирамадим-ку. Бўлмаса бу иш қўлимдан келарди. Бир оғиз ишора қилсан, диконглатиб судраб келишарди... Ҳолбуки ўзингиз ёллаган қотил сизни бу ерга бошлаб келди. Беш юз минг илинжида. Ана сизнинг ҳақиқий баҳойингиз!

Омина Асилова қўлидаги дискни DVDга қўяди. Экранда майкачан, елкаларига, билакларига турли татуировкалар чизилган бақувват эркак ялтоқланиб, эгилган кўйи гапирмоқда:

– Манинг заррача айбим йўқ, опажон. Мани мажбур қилди! Бивший прокурор Мухторов мажбур қилди! Бўлмаса ҳалиям связларим бор, ўзингни қамоққа тиқаман, турмада чириб кетасан деди! Из қолдирмасдан ўлдир деди!..

Омина Асилова телевизорни ўчиради ва дискни олиб, қўлида айлантиради.

– Шунинг учун, келинг, яхшиси ўтган ишга саловат дейлик-да, келишиб қўя қолайлик. Мисол учун, мен қизингизнинг хунининг баҳосини бир миллионга тенг деб баҳоладим. Долларда. Хоҳласангиз нақд. Хоҳласангиз чекда, карточкада. Кейин бҳай-бҳай. Дўстлик, биродарлик. Ёки бўлмаса бир-биримизни мутлақо танимаймиз. Тамом-вассалом.

Мухторов чўнтағидан қизининг кулиб тушган суратини олади ва Асиловага кўрсатади.

– Шу қизнинг... шу фариштанинг ўрнини мол-дунё, пул боса оладими? – дейди у кўзларида жиққа ёш билан. – Мен факат бир нарсани билишни истайман. Айби нима эди ахир бу норасиданинг? Айби менинг қизим бўлганими? Нега унда мени эмас, уни ўлдирдиларинг? Нега мени бурда-бурда қилиб ташламадиларинг? Нега ўзимнинг гўштимни ўзимга егизмадиларинг? Нега менинг мурдамни хор-зор қилмадиларинг? Ахир бир оғиз сўрамайсанларми: “Эй ота, қизингнинг ўрнига ўзинг ўлишга розимисан?” деб. Ахир жонимни оёқларинг остига ташлардим-ку. Ўзингни от десаларинг отардим, ўзингни ёқ десаларинг ёқардим, ўзингни поезднинг тагига ташла десаларинг ташлардим. Фақат ёлғизгина қизгинамга, қизалоғимга, онасидан ёдгор эркатойимга заррача бўлса-да озор бермасаларинг бас эди! Бас эди!.. Ҳа, мен қизалоғимнинг қотилларини узок изладим. Узок! Кўп янгишдим ҳам. Аммо охири барibir топдим. Мен бир нарсани аниқ биламан: қизингнинг ёки неварангнинг ўрнига ўзинг ўлишга розимисан деб сўрасам дарров савдолашишга тушасан.

– Нега энди? – совуққонлик билан гапиради Асилова. – Қизим, неварам учун қирқта жоним бўлса, ҳаммасини қурбон қилишга розиман.

– Аслида сен энг пасткаш, ифлос хотинсан! – дейди Мухторов.

Тепакал Кабиров жаҳл билан ён чўнтағидан нилига овоз сусайтиригич ўрнатилган узун тўппончасини чиқаради ва:

– Бас қил, абллаҳ! – деганча Мухторовга ўқ узади.

Ўқ Мухторовнинг қорнига тегади.

Мухторов орқага қалқиб кетади, аммо йиқилмайди.

– Бу нима қилганинг? – жаҳл билан бақириб беради Асилова ёрдамчисига қараб. – Бекит бу матоҳингни!

Кабиров ноилож тўппончани чўнтағига солиб кўяди.

Чап қўлинин қон силқиб чиққан қорнига қўйган Мухторов истеҳзоли кулимсирайди:

– Тўғри, отгандан кейин ўладиган ё йиқиладиган қилиб отиш керак эди. Ҳеч бўлмаса миямнинг қатиғини чиқариб юбориш керак эди. Чунки мен то тирик эканман, сени тинч қўймайман!

Асилова унга дикқат билан қарайди:

– Мен “Ҳаёт шафқатсиз” деган гапни кўп ишлатаман. Аслида ҳам ҳаёт шундай. Ҳаётда нималар бўлмайди дейсиз. Шунака бўлиб қолдики, биз баррикаданинг икки томонида туриб қолдик. Аммо энди у даврлар ўтди. Мени жуда ҳузур қилиб яшади деб ўйласангиз ҳам хато қиласиз. Тасаввур қиласизми, ўн сўм топсам, икки сўмини ўзимга олиб қолганини

керакли одамларга, бизни ҳимоя қилиб турғанларга тарқатиб юрган эканмиз. Яқинда ёрдамчим билан шуларни ҳисоблаб чиқдим. Яширмайман, мен “Будунёда сотилмайдиган одамнинг ўзи йўқ. Фақат ҳар кимнинг ўз баҳоси бор” принципи асосида ишладим. Кимга нима берсам, қанча берсам – ҳаммасини ёзиб бордим. Бирорининг оғзини мойлашга, бошқасига ҳовли қуриб беришга, яна биттасига қиммат иномарка олиб беришга... Ишонаверинг, уларнинг орасида сизнинг ҳамкасларингиз ҳам етарлича топилади. Ҳатто неча марта тўшаклариға қиз олиб бориб ётқизганимиз ҳам ҳужжатлаштириб қўйилган. Улар маза қилиб яшашаяпти. Бундан кейин ҳам шундай яшашади. Чунки мен кетсам, ўрнимга бошқаси келади. Ҳар қалай, ўрним бўш қолмаслиги аниқ. Сиз-чи, сиз ҳалол бўлиб нимага эришдингиз? Нима обрў топдингиз? Топганинг умрингизнинг охирида қорнингизга санчилган битта ўқми, жаноб собиқ прокурор?

– Мен ҳамма учун жавоб бермайман, – дейди Мухторов. – Аммо ҳамиша жамиятни сенларга ўхшаганлардан тозалашга уриниб келганман. Менга ўхшаганлар, мендан ҳам яхши ишлайдиганлар кўплигини ҳам яхши биламан.

Асиева Мухторов томонга қарайди-да:

– Ҳаёт шафқатсиз, жаноб прокурор, – деб қўяди оҳиста. Сўнг сўрайди: – Охирги тилагингиз борми?

– Умрим охирида қорнимдаги ўқقا қўшиб яна иккита аглах, разил, пасткашни ўзим билан бирга олиб кетолмаётганимдан афсусдаман, – дейди Мухторов. – У ёқقا боргач... қизимнинг кўзига қандай қарайман, билмайман... Охирги тилагим... мени қизимнинг, хотинимнинг ёнига қўйишса. Шунинг учун... мурдамни уйимга ёки ўша олиб бориб ташлаш сенлар учун унчалик қийин эмасдир...

Омина Асиева ўрнидан туради:

– Майли, ўзингиз биласиз. Бу қисматни ўзингиз, ўз ихтиёрингиз билан танладингиз. Майли, охирги илтимосингизни ҳам адо этамиз. Фақат уйингизда ё қабристонда анави пул учун онасини ҳам сотадиган Писка билан... ачомлашиб ётасиз. Жиноятчи ва собиқ прокурор! Кўкрагингизда эса манави диск бўлади. Одамлар билиб қўйишсин сизнинг кимлигингизни! – Асиева эшикка қараб буйруқ беради: – Олиб чиқинглар.

Иккита бақувват йигит киради ва бир амалаб оғриқни билдириласликка уринаётган Мухторовни қўлтиғидан ушлаб олиб чиқиб кетишади.

* * *

Кундуз.

Шаҳар чеккароғидаги маҳаллалардан бири.

Журналист Умаров бир кенг дарвозали ҳовли ёнида маҳалла оқсоқоли билан гаплашиб турибди.

Берироқда турган машина рулида маҳмадона Шомуродов.

– Бу масалада сизлар билан маслаҳатлашмадими? – деб сўрайди Умаров.

– Каримжон ака анчадан бери бу ниятини бизга айтиб юрарди, – дейди оқсоқол. – Лекин ўтган ҳафта келиб, “Бўлди, ҳовлимни болалар уйига ўтказиб келдим” деганида, очиғи, биз унчалик ишонмадик. Ахир шу замонда... Кейин билсак, чин экан. Кейин Каримжон аканинг машинасини ҳам сотиб, ўзи қаёққадир кетмоқчи бўлиб юрганини эшитдик.

– Қаёққа кетмоқчи экан? – деб сўрайди Умаров.

– Буни ҳеч ким аниқ билмайди. Лекин маҳалламиздан кимдир уни паспортини кўтариб, виза тўғрилаб юрганида қўрган экан. Шунга қараганда Каримжон ака чет элга дам олишга кетганми дейман-да...

– Сизга раҳмат, – дейди Умаров.

– Айтгандай, – дейди оқсоқол, – у кишини кўпинча қабристонда учратиб қолардим.

– Қабристонда у кишининг кими бор? – деб сўрайди Умаров.

– Кими бўларди, хотини, қизи...

– Раҳмат сизга, – дейди Умаров яна бир бор.

Умаров илдам келиб машинага ўтиради.

– Шомуродов, қабристонга, – дейди Олимов.

Машина катта йўлга чиқиб олади.

– Тинчликми, нега бунча ёв қувгандай зипиллаб жўнаб қолдик? – деб сўрайди Шомуродов. – Бир пиёла чойини ҳам ичмадик бечоранинг...

– Ишқилиб, адашаётган бўлай, – дейди Умаров ўйчан ҳолатда. – Лекин назаримда Каримжон ака Дубайга, қизининг қотиллари билан ҳисоб-китоб қилишга жўнамоқчи бўлиб юрибди.

– Йўғ-э, унчаликка бормас, – дейди Шомуродов.

– Билмадим-ов, – деб қўяди Умаров ўйчан тарзда.

Машина текис йўлда елиб кетади.

Қабристон.

Умаров ўйчан тарзда қабрлар оралаб юрибди.

Ногаҳон у панжара билан ўралган қабр ёнида ётган иккита гавдани кўриб қолади.

Умаров шошиб шу томонга юради.

Бу мурдалардан бири Писка. Иккинчиси эса Мухторов.

* * *

Россиядаги қишлоқ.

Намозшом палла.

Лой йўл.

Қатор жойлашган кулбалар.

Акмал билан кўзойнакли йигит Даврон кўча бошидаги уйлардан бирини тақиллатишади.

Ичкаридан етмиш ёшлар чамасидаги кичкинагина кампир пилдираб чиқиб келади.

(Сұхбат рус тилида кечади)

– Ким у? – деб сўрайди кампир.

– Биз, – дейди Даврон. – Кечирасиз, онахон, адашиб қолдик.

– Марҳамат, марҳамат, киринглар, – дейди хурсанд бўлиб ккетган кампир.

Акмал билан Даврон ичкарига киришади.

Кампир йигитларни ошхонага бошлаб киради ва уларнинг йиртиқ-ямоқ усти-бошига, ўсиб кетган соч-соқолига қараб, вазиятни тушунади шекилли, дастурхонга нон-чой, тухум қўя бошлайди.

– Озгина ши қилгандим, ичасизларми? – деб сўрайди кампир.

– Яна-я? – дейди Даврон. Сўнг бош эгади: – На илож. Қисматдан қочиб қутулиб бўлмас экан.

Кампир уларга бир косадан карам шўрва беради, дастурхонга тўртта қайнатилган тухум ҳам қўяди.

Оч йигитлар дастурхонга ташланишиб, шоша-пиша овқатланишга тушишади.

Кампир чеккароқقا ўтиб, уларга ачиниб қараб ўтираркан, сўрайди:

– Қурилишданмисизлар?

– Ҳа, – дейди оғзи тўла овқат бўлган Акмал бир амаллаб. Сўнг ҳайрон бўлиб сўрайди: – Каердан билдингиз?

– Э, бу қурилиш бўлмади, бало бўлди, – дейди кампир зорланиб. – Қанча мусофиirlарнинг бошига етди, деб эшитамиз. Гоҳида қандайдир аёлларни ҳам олиб келиб қолишади. Бақир-чақир, дод овозлари шу ергача эшитилиб қолади. Яна денглар сизларга ўхшаш янги-янги ишчилар келаверади.

– Гапингиз тўғри, – дейди Даврон. – Бугун бизнинг бригадамиздан бир йигит вафот этди. Ишнинг оғирлигига чидай олмади бечора. Ўзи нимжонгина эди. Бизнинг бошимизга ҳам шу кун тушмасидан бурун қочиб қолайлик дедик.

– Зах ертўлада ётавериб буйрагимни шамоллатиб қўйдим, – дейди афти буришиб кетган Акмал. – Оғриғига чидаб бўлмаяпти.

– Мен бўлсам оғир юқ кўтаравериб жигаримни ишдан чиқардим, – дейди Даврон.

– Ишқилиб, хужжатларингни ололдиларингми? – меҳрибонлик билан сўрайди кампир.

– Қаёқда дейсиз! – хўрсинади Акмал. – У ваҳшийлар бу ҳақда эшитишни ҳам исташмайди.

Кампир ҳайрон бўлиб сўрайди:

– Унда... ўз юртларингга қандай етиб оласизлар, болаларим? Бу ерлар-ку, ўрмон. Лекин шаҳарга чиққанларингдан ҳамма ёқда милиса бор-ку.

– Бир амаллаймиз, онахон, – дейди Акмал.

– Паспортсиз самолётга чиқолмайсизлар-да, шуни айтаяпман, – дейди кампир.

– Самолётда бўлмаса поездда кетармиз, – дейди Акмал.

– Лекин ҳозир паспортсиз поездга ҳам қўйишмайди, – дейди кампир.

– Поездга қўйишмаса, онахон, йўл машиналарига осилиб кетамиз.

Агар йўл машиналарига ҳам қўйишмаса пиёда кетамиз. Агар пиёда кетишига ҳам қўйишмаса, эмаклаб кетамиз. Керак бўлса тирнокларимиз билан ер қазамиз, лекин нима қилиб бўлса ҳам юртимизга етиб оламиз! – дейди Акмал.

– Йўлларинг ойдин бўлсин, болаларим. Фақат орқаларингдан анави чакиб олган гўрсухталар излаб келиб қолмасларидан йўлга тушинглар, – дейди кампир меҳрибонлик билан. Сўнг ичкарига кириб кетиб, бир қучоқ кийим ва бироз пул олиб чиқади. – Чолимдан айрилганимга уч йил бўлди. Ёлғиз ўғлим уйланиб, шаҳарда яшаяпти. Манави унинг кийимлари. Сизларга тўғри келиб қолса керак. Манави пул эса йўлда сизларга керак бўлиб қолади.

– Раҳмат сизга, онахон, – дейди ўпкаси тўлган Акмал титроқ овозда.

– Олинглар, овқатни олинглар, – дейди кампир. – Ҳали узоқ йўл юрадиганга ўхшайсизлар.

Иккала йигит овқатланишда давом этишади.

* * *

Тошкент.

Кундуз.

Бош прокуратура биноси.

Интерпол вакили Азим Нуриев ва прокуратура ходими Собир Шодиев бош прокурор ўринбосари кабинетида ўтиришибди.

– ...Ошиғич сафарда эдим. Интернетда Умаровнинг шов-шувли мақоласини ўқиб қолдиму, бу ёққа шошдим. – дейди Нуриев. – Аввалига ҳайрон қолдим. Сўнг...

– Куёв бола худди ўзини ўзи осиб ўлдиргандай таассурот қолиши учун кимдир астойдил меҳнат қилган. Марҳум ёриб кўрилганда экспертиза натижалари унинг аввал бўғиб ўлдирилганини кўрсатди, – дейди Шодиев.

– Шунаقا денг, – дейди бош прокурор ўринбосари.

– Худди шундай, – дейди Шодиев. – Шунингдек, журналист Маҳмуд Умаров тақдим этган дискетадаги ёзув ҳақиқий эканлиги исботланди.

– Бечора Мухторов... Тергов-тезкор гурухимиз ёмон ишламаяпти шекилли, – дейди бош прокурор ўринбосари. – Анча-мунча алданган хотин-қизларимизни қайтариб олиб келдик. Аэропорт, темир йўл станцияларида назоратни кучайтирдик. Йўловчиларга эслатмалар бераяпмиз... Эҳ, агар бутун жиноий тизимни, унинг ҳамма ҳалқаларини бир йўла фош эта олсак эдик.

– Тергов-тезкор гурухи айнан шундай йўлдан бораяпти, – дейди Шодиев.

– Сиз, – дейди бош прокурор ўринбосари Шодиевга мурожаат қилиб, – зудликда Олимовнинг озод қилинишини назорат қилишни ўз зиммангизга олинг. Кейин уни бу ерга олиб келинг. Ўзим узр сўрайман. Сизга эса, ўртоқ Нуриев, – бош прокурор ўринбосари Нуриевнинг қўлини сиқиб қўяди, – катта раҳмат. Ишонаманки, ҳамкорлигимиз бундан кейин ҳам давом этади.

– Албатта, – дейди Нуриев ўрнидан туаркан.

* * *

Кундуз.

Хорижий давлат.

Исловатхона.

Хонани қизил чироқ хира ёритиб турибди.

Тўрда икки кишилик диван.

Ўртада егуликлар ва ичимликлар қўйилган юмалоқ стол, иккита кресло.

Деворда ярим яланғоч аёлларнинг суратлари.

Тўшак чеккасида забун ҳолатда калтароқ, ёқаси ўйикроқ қўйлак кийган Ҳулкар ўтирибди.

Эшик очилади.

Сесканиб кетган Ҳулкар учиб ўрнидан туради.

Хонага соқолдор бир эркак кириб келади.

Ҳулкар жон ҳолатда унга инглиз тилида ялинаркан, хўнграб йиғлаб юборади:

– Илтимос, менга тегманг, илтимос... Одаммисизлар ўзи ё ҳайвон...

Эркак унга ҳайрон бўлиб қарайди. Сўнг инглиз тилида дейди:

– Хали она сутинг оғзингдан кетмаган тўдакка ўхшайсану... бу ерда нима қилиб юрибсан?

Ҳиқиллаб йиғлаётган Ҳулкар тушунтиришга уринади:

– Мени алдаб олиб келиб сотишиди... Кўнмагандим, ухлатиб қўйиб...

Видеога ҳам олишибди...

– Ким сени сотди? Бизниkilарми? – қизиқиб сўрайди эркак.

– Йўқ, – ҳиқиллади Ҳулкар. – Ўзимизникилар...

– Шунаقا де. Чатоқ бўлибди-ку, – эркак афсусланиб бош чайқайди. –

Менга бўлса бунақаларнинг ўzlари бу ерга келиш учун навбатда туради, дейишганди... Айтгандай, инглиз тилини қаерда ўргангансан?

– Коллежда, – дейди Ҳулкар.

Эркак бир нарсани тушунгандай сўрайди:

– Сизларда коллежда пулга ўқитишадими?

– Йўқ, текин, – дейди Ҳулкар.

Эркак баттар ҳайрон бўлади:

– Шундай ўқиган, тушунган, зиёли қиз юртига хизмат қилиш ўрнига, бу ерларда танасини сотиб юрса-я...

– Онам оғир касал бўлиб қолганди, – дейди Ҳулкар. – Операцияга ҳам, даволатишга ҳам катта пул керак бўлиб қолганди.

– Шунаقا де... – дея эркак чўнтағидан қўл телефонини чиқариб беради. – Ҳай, майли, мана сенга телефон. Рухсат бераман, уйингга бир марта қўнғироқ қил.

Ҳулкар ишонқирамай эркакка қарайди, унинг рост гапираётганини англағач, шоша-пиша телефонни олади ва рақамларни теради.

Ҳулкарнинг Тошкентдаги ҳовлиси.

Жимжит.

Телефон жиринглайди.

Бурчакда биқинибгина ўтирган Ҳурматой чопиб келиб трубкани кўтаради. У тарафдан Ҳулкарнинг овози эшитилади:

– Алё... Алё. Ойижон! Ойижон! Бу мен, Ҳулкарман! Ким бу?

Опасининг овозини эшитган Ҳурматой изиллаб йиғлаб юборади ва тутила-тутила дейди:

– Опа... опа... ойижоним ўлиб қолдилар...

Исловатхона.

Ҳулкарнинг қўлидаги телефон ерга тушиб кетади. Унинг ўзи ранги оқариб, тўшакка шилқ этиб тушади.

Эркак ҳайрон бўлиб унга қарайди ва ўрнидан туриб, столча устидаги сувдан олиб келиб Ҳулкарнинг юзига сепади.

Ҳулкар сесканиб кўз очади.

– Нима гап? – дейди араб.

– Онамлар... вафот этибдилар... – дея аранг пицирлайди Ҳулкар.

Эркак бир нималарни пицирлаб, юзига фотиха тортади. Сўнг яна телефонни Ҳулкарга тутади:

– Рухсат бераман. Яна бир марта ё уйингга, ё шу ердаги элчиҳоналарингга қўнғироқ қил. Элчиҳонанинг телефон рақамини биласанми?

Ҳулкар бош чайқайди.

Эркак ҳайрон бўлиб елка қисади.

Ҳулкар бир муддат ўйланиб қолади. Сўнг шоша-пиша рақам теради.

– Зайнаб хола! Ўзингизмисиз? – қичкиради у телефонга. – Ҳа, менман! Сўрашишга вақт йўқ. Э, қанақа Покистон? Қанақа элчиҳона? Эшиждим... Энди мени яхшилаб эшитиб олинг. Аблаҳ Бадриддин амаки бизни сотган экан. Ўн саккизтамизни ҳам. Жияни шериги экан. Тез прокуратурага боринг. Ариза беринг. Бизни олиб кетишин. Тез боринг! Тез! Ҳа, Дубай шахри денг. Ҳозир... – Ҳулкар эркакка ўгирилиб, инглиз тилида сўрайди: – Бу қанақангি... жой? Манзили керак.

Эркак жавоб беради:

– “Қора қаҳва” меҳмонхонаси. Энг арzon меҳмонхона...

Ҳулкар яна телефонга қичкиради:

– Олтитамиз “Қора қаҳва” мөхмөнхонасидамиз. Қолганлар қаердалигини билмайман... Хўп... Фақат тез...

Хулкар оғир сўлиш олади ва телефонни эгаси тутаркан:

– Катта раҳмат, – дейди.

– Марҳамат, – дейди эркак. – Майли, мен борай... Айтгандай, хонани бир соатга банд қилганман. Бемалол дам ол. Эҳ, – эркак афсус билан бош чайқайди, – фарзанд ўз онасининг вафотини ўзга юртда туриб эшитса-я... Эркак чиқиб кетади.

Хулкар ўзини ўринга ташлайди ва ёстиқни маҳкам тишлаганча овоз чиқармасликка уриниб бўзлаб юборади:

– Ойижон... ойижонгинам... мени кечиринг, ойижоним...

* * *

Тун.

Кўкда юлдузлар чараклаб турибди.

Тўлин ой борлиқни сутдай ёритган.

Тоғ яқинида жойлашган қишлоқ.

Итларнинг ҳуриши эшитилади.

Тамомила ҳолдан тойган, оч-наҳор, соқоллари ўсиб кетган, кийимлари далвагай Акмал аранг судралиб ўз ҳовлиси дарвозасига етиб келади ва дарвозага суюниб олади.

Акмал бир амаллаб ўнг қўлини кўтаради ва дарвозани урмоқчи бўлади. Аммо бунга кучи етмайди.

Акмал чап қўлини кўтариб дарвозани тақиллатмоқчи бўлади. Аммо бу ҳам бефойда.

Шунда Акмал пичирлайди:

– Онажон... онажон...

Худди шу маҳал ичкаридан, худди фарзандининг чорловини эшитгандай онанинг хавотирли овози эшитилади:

– Акмалжоним чақиргандай бўлдими...

Шу томонга яқинлашиб келаётган “шип-ши” қадам саслари эшитилади.

Акмал:

– Онажон... – деганча қақраб кетган лабларини аранг қимирлатиб шивирлайди ва қаддини ростламоқчи бўлган маҳали ерга гуп этиб ҳушсиз қулайди...

* * *

Кечқурун.

Тергов-тезкор гуруҳ раҳбари Олимовнинг иш кабинети.

У компьютер қархисида ўтириб олган.

– Анча-мунча муҳим маълумотларни тўплаб улгурдик, – демоқда экрандан Камола. – Таъминотчилар, харидорлар, тайёрлов марказлари... Яна бир муҳим ҳолат: маҳаллий полициянинг ҳам Асиловага нисбатан ўз

эътиrozлари бор экан. Асилова тасарруфидаги исловатхонадан иккита жувон экстремистлар томонидан сотиб олиниб, шоҳид аёлликка тайёрланган. Улардан бири яқинда Покистондаги тинч митинг пайтида ўзи билан қўшиб ўн битта фуқарони портлатиб юборган.

- Демак қопқонни ёпиш вақти келибди-да, – дейди Олимов.
- Шунга ўхшаяпти, – дейди Камола.
- Яхши, мен раҳбарият билан гаплашиб кўраман, – дейди. – Аммо ўша гап: ўзингизни эҳтиёт қилинг.

Камола илжаяди:

- Бу гап аввало ўзларига тегишли шекилли...

Олимов кулимсирайди:

- Охири яхши тугаган нарса барibir яхши-да...

* * *

Кундуз.

Туман маркази.

Туман прокуратураси биноси.

Соч-соқоли олинган, озода кийинган Акмал прокуратура биносидан чиқиб келмоқда.

Шу маҳал у ўзига пешвоз келаётган Зайнаб хола билан Ҳурматойни кўриб қолади. Зайнаб хола Ҳурматойни етаклаб олган.

– Ассалому алайкум, Зайнаб хола, – дейди қайғуга чўмган Акмал. – Эшитдим... Бандалик... Кеча кечаси келдим. Ҳозир фотиҳага ўтмоқчи бўлиб тургандим...

– Бирдан шунаقا бўлиб қолди, – дейди ўпкаси тўлган Зайнаб хола. – Раҳмат, онангиз келиб “қудам”лаб турдилар.

– Уйда одам борми? – дейди Акмал.

– Уйда... – Зайнаб хола бир лаҳза иккиланади. – Бугун пайшанба-ку. Маҳалла қариялари чиқишган. Ўшалар фотиҳаларни қабул қилиб олишаяпти... Майли, биз борайлик бўлмаса.

– Тинчликми? – дейди Акмал прокуратура биносига ишора қилиб. – Эрталабдан бу ерга келаяпсизлар.

Зайнаб хола тараддуланиб қолиб:

– Ўзингиз-чи? – деб сўрайди.

– Э, хабарингиз бордир, Россияга ишга кетгандим. Мошенникларнинг қўлига тушиб қолган эканман. Роса қийналдим. У ёқда шерикларимиз қолиб кетишиди. Шунга прокуратурага битта ариза ёзив бериб кетаяпман, – дейди Акмал.

Буни эшитган Зайнаб хола анграйиб қолади. Сўнг пиқиллаб йиғлаб юборади ва очигига кўчади:

– Акмалжон. Сиз у ёқча кетганингизда... Бир маҳалладошига ишонган Ҳулкар ҳарна уйга ёрдам деб Покистонга ишга жўнаган экан... Лекин алдаб... сотиб юборишибди... Телефон қилди ўша ёқдан... Шунга... прокурорга ариза бериш учун келаяпмиз...

– Нима?! – қиңқириб юборади Акмал ва асфальтга “гурс” этиб ўтириб қолади.

* * *

Хорижий давлат.

Эрта тонг.

Шаҳар чеккаси.

Дараҳтлар орасида ҳашаматли бино. Бино баланд девор билан ўраб олинган.

Дарвозани иккита бақувват қўриқчи қўриқламоқда.

Бир гуруҳ қизлар гилам тўшалган залдан ўтиб, йўлак охиридаги ялтироқ эшикли хона ёнига боришади. Улар орасида Камола ҳам бор.

Эшик ортидан Омина Асилованинг фўнғиллаган овози эшитилмоқда.

Каттагина хонада тик туриб олган Омина Асилова қўлидаги қофозга қараб бир нималарни ўқимоқда, унинг тепакал ёрдамчиси Кабиров эса ноутбук компьютерига бир нималарни ёзмоқда.

Хумора опа эшикни очади. Қизлар ичкарига киришади.

– Омина опа! Янги группа, – дейди Хумора опа.

Омина Асилова хона пойгагида уялибгина турган қизларга синчков кўз ташлайди. Сўнг Камоланинг ён чўнтағидан чиқиб турган ручка қопқоғида нуқтадан яшил чироқ ёниб турганини кўриб, сергак тортади ва :

– Қачондан буён бунақангни ишлар билан мен шуғулланадиган бўлиб қолдим? – дейди жаҳл билан.

Довдираб қолган Хумора опа ўзини оқлашга шошади:

– Вой, узр, Райхон йўқлиги учун...

– Боринг, чиқинг! – дея асабий тарзда эшикни кўрсатади Омина Асилова. – Биз бу ерда мухим иш билан бандмиз. Халақит берманг.

– Вой, асло хавотир олманг, – дея тез-тез гапиради Хумора опа. – Булар бу ерга етгуналарига қадар минг чиғириқдан ўтиб, пишиб келишган. Ўзим отвечаю!

– Шунақами? – ҳамон қизларга ишонқирамай қарайди Асилова. – Нимагадир буларингнинг қарашлари менга ёқмаяпти. Айниқса манавинисиники. – Шундай дея Асилова Камолага ишора қиласди.

– Вой, – дейди Хумора опа жон-жаҳди билан. – Бу асал қизим бу ерга оптом мол олишга келиб, пулини ўғирлатиб қўйган экан. Бозорда танишиб қолгандим. Озгина ёрдам берайлик деб олиб келганим...

– Майли, – дейди Асилова Хумора опага ёвқараш қиларкан, – ҳаммаси жойида бўлса буларни обориб жойла, сарагини саракка, пучагини пучакка ажрат.

Кабиров аста ён томондан Камолага яқинлашади ва чаққон ҳаракат билан Камоланинг чўнтағидаги ручкани тортиб олади. Кабиров ручка қопқоғини бурайди. Ручка иккига ажаралади. Шунда ручканинг қопқоқ қисми флешка эканлигини кўринади.

– Видеокамера, – дейди Кабиров қопқоқни юқори кўтариб. – Компьютерга солиб, bemalol кўраверасиз!

Асилова ғазаб билан Камолага яқинлашади:

– Сен ифлос...

Камола чаққонлик билан ўзини бир қадам ортга олади ва айланиб, Кабировнинг қорнига тепади. Кабиров энгашиб қолган маҳал Камола унинг кўлидаги флешкани тортиб олади ва бўш қўли билан ён чўнтағидаги қўл телефонини чиқаради ва унинг бир тугмачасини босади.

– Охрана! – дея қичқириб юборади Кабиров.

Шу маҳал хонага тўртта маҳаллий полициячи ҳамроҳлигида Олимов ва Эргаш кириб келишади. Улардан кейин иккита маҳаллий полициячи қўлларига киshan солинган, қора кийинган, юзини ёпиб олган “шоҳид аёл”ни бошлаб келишади. Маҳаллий полициячилардан бири ёнидан киshan чиқарган ҳолда Асиловага инглиз тилида мурожаат қиласди:

– Сиз мамлакатимиз қонунларини бузишда, халқаро наркотик моддалар савдоси, одам савдосини уюштиришда ҳамда террорчилар билан алоқада айбланаасиз...

Полициячи гапираётган маҳал секин-аста ноутбук компьютери томон яқинлашаётган Кабировнинг безовталаниб қолганини кўрган Камола тезлик билан унинг ёнида пайдо бўлади ва Кабиров энди “Delete” тугмачаси устига олиб борган бармоғини тутиб юборади.

Кабиров чўчиб тушади.

Камола компьютер экранига диққат билан қарайди ва Олимовга қараб дейди:

– Қаранг, кимга, қачон, қаерда, қанча берилгани... Қисқаси, “керакли одамлар” рўйхати. – Камола комъютер тугмачасини босади: – Бу тарафида эса қачон қанча “мол” олиб келингандиги...

Олимов мамнун бош иргаб қўяди.

Полициячи Асиловага мурожаат қилишда давом этиб, “шоҳид аёл”га ишора қиласди:

– Бу жувон сизнинг ҳарамингиздан мутаассиб экстремистлар томонидан сотиб олинган ҳамда қўпорувчилик ишлари учун тайёрланган.

Бирдан бўشاшиб қолган Омина Асилова креслосига ҳоргин тарзда чўкаркан, Кабировга мурожаат қиласди:

– Манави жиблажибонларга айтинг, беш-ўн дақиқа мени тинч қўйишишин. Ҳеч бўлмаса ўзим қурган шу уйим билан тинчгина хайрлашиб олай.

Кабиров полициячиларга Асилованинг талабини таржима қилиб беради.

Бир-бирига қараб олган полициячилар рози бўлиб бош иргашаркан, бояги гапиргани:

– Фақат беш дақиқа, – дея беш бармоғини кўрсатади.

Олимов, ноутбукни учоқлаб олган Камола, Эргаш, полициячилар ва Хумора опа бошчилигидаги қизлар секин хонадан чиқа бошлашади.

– Сен ҳам бор, – дея Кабировга мурожаат қилади Асилова.
Бирдан маъюс бўлиб қолган Кабиров бош чайқайди.
– Сениям кўп қийнадим, – дейди Асилова. – Бор, кет. Фарзандимиз ҳаққи...

Кўзлари жиққа ёшга тўлган Кабиров Асиловага узоқ вақт қараб қолади сўнг аста пи chirлайди:

– Ҳаёт...

Унинг фикрини Асилова давом эттиради:

– ... шафқатсиз.

Кабиров аста келиб Асилованинг елкасига бош қўяди. Асилова уни қучиб олади.

Олимов, Камола, Эргаш, Хумора опа, полициячилар, қизлар ҳовлига чиқишади. Худди шу маҳал Асилова билан Кабиров ўтирган хона портлайди.

Портлаш тўлқини Олимов, Камола ва бошқаларни ерга йикитади. Қизлар чувиллаб додлашади, Хумора опа шайтонлаб қолгандай бақириб ўтиргайди. Деразалари отилиб кетган хона ичида олов тиллари кўкка ўрмалай бошлайди.

Олимов шишиб чиқкан манглайнин силаганча сапчиб ўрнидан туради ва ёнаётган хона томон отилади.

Камола ҳам шошиб ўрнидан туради.

Олимов ичида олов гуриллаб ёнаётган хона ёнига келади ва беҳол ўтириб қолади...

* * *

Тошкент.

Кундуз.

Суд биноси.

Очиқ суд бўлмоқда.

Судланувчилар курсисида Бадриддин амаки, Алимардон, Хумора опа ва яна ўнга яқин эркак-аёл ўтирибди.

Прокурор айблов хулосасини ўқимоқда:

– ...Айбланувчи Бадриддин Боқиев алдов йўли билан ўзи истиқомат қиладиган маҳалладаги камхаржроқ оилаларнинг қизларидан ўн саккизтасини “Покистондаги элчинномизда ошпаз бўлиб ишлайсизлар” дея Украина орқали Дубайга учирив юборади. Текшириш жараёнида айбланувчи Бадриддин Боқиев ҳар бир қизни ўз жияни Райхон Асиловага уч минг доллардан сотиб юборганлиги аниқланди.

– Тухмат қилманг! – ўрнидан туриб кетади Бадриддин Боқиев. – Уч мингдан эмас, икки ярим мингдан.

Залда ўтирганлар кулиб юборишади.

Олдинги қаторда ўтирган, тинмай тасбех ўгираётган оқ рўмолли кампир – Ҳожи она бобиллаб беради:

– Прокурор болам. Тухмат қилманг. Манинг болам ёмон ишларга қўл урадиганлардан эмас.

Тўсатдан прокурор айблов хulosаси матнини ўқишдан тўхтайди ва кўзойнагини олиб, онахонга мурожаат қиласди:

– Онахон. Мана сиз ҳажга бориб келган экансиз. Лекин бегуноҳ қизларнинг, аёлларнинг кўз ёшлари, топталган номуслари, қолаверса ҳаётлари эвазига келган пулга ҳаж зиёратини қилиб келиш сизга жоизмиди?

Онахон бир зум довдираб қолади, сўнг ўзини оқлашга уринади:

– Ҳеч ким уларни мажбурлаб олиб кетмаган. Ўзлари чопқиллаб келиб, ялиниб туриб олишган...

Прокурор афсус билан бош чайқайди ва кўзойнагини тақиб, айблов хulosасини ўқишда давом этади.

– Иккинчидан...

* * *

Кундуз.

Туман маркази.

Марказий шифохона.

Озиб кетган, ранглари сўлғин, соchlари паришон Ҳулкар шифохона дарвозасидан чиқиб келмоқда.

Уни дарвоза ёнида Акмал кутиб турибди.

Аммо Ҳулкар худди Акмални кўрмагандай индамаадан ўтиб кетади.

Ҳайрон бўлган Акмал Ҳулкарнинг орқасидан бориб етиб олади ва сўрайди:

– Тинчликми? Нима бўлди?

“Ялт” этиб Акмалга қараган Ҳулкарнинг кўзларида чексиз изтироб, армон ва вахима.

– Диагноз тасдиқланди, – дейди қиз руҳсиз тарзда. – Мен у ёқдан СПИД орттириб келибман... Алвидо... Бахтли бўлинг, Акмал ака... Мени бошқа безовта қилманг...

То анграйиб қолган Акмал ўзига келгунига қадар Ҳулкар тез-тез юриб йигитдан узоқлашади...

* * *

Кундуз.

Тошкент шаҳри.

Бош прокуратура биноси.

Каттагина кабинетда бир неча киши диққат билан қоғозга чиқарилган узун рўйхатни кўздан кечиришмоқда. Яна бир неча киши эса компьютерда бир нималарни ўқишишмоқда.

– Ҳаммаси тушунарли, – дейди ниҳоят тўрда ўтирган бош прокурор ўринбосари. – Дарҳол тергов-тезкор гурухи тузиб, терговни бошлаб юборинглар! Бу иш шахсан ўзимнинг назоратимда бўлади!

* * *

Кундуз.

Тошкент шаҳри.

Чойхонада улфатлари билан ўтирган ва энди лаганларга сузилган ошга қўл чўзаётган прокурор Эшоновни прокуратура ходимлари бошчилигидаги маҳсус қисм аскарлари қўллариiga кишан солган ҳолда олиб чиқиб кетишади.

Аэропорт биноси.

Эшикдан бепарво чиқиб келаётган Насрулло аканинг икки ёнидан икки милиция ходими шиддат билан яқинлашиб келади ва унинг қўлтиғидан тутганча, диконглатиб судраб хизмат машинасига солиб кетишади.

Сауна.

Маҳсус курсига ётиб олган яланғоч амалдор Асадуллаевни ярим яланғоч аёл массаж қилмоқда. Сауна эшиги қаттиқ тепкидан қўпорилиб тушади. Суанага отилиб кирган никобдаги маҳсус қисмнинг тўртта аскари Асадуллаевнинг қўлини орқага қайириб, кишан солишади. Кўрқиб кетган массажчи аёл лол бўлиб қолади.

Темир йўл вокзали.

Темирйўлчилар кийимидағи бир киши дипломатини маҳкам кучоқлаганча бинодан отилиб чиқиб, таксилар томон чопади. Аммо қаршисидан иккита милиционер ходими чиқиб келаётганини кўриб, беихтиёр тўхтаб қолади. Дипломат қўлидан тушиб кетади. Дипломат очилиб қолади ва унинг ичидаги долларлар, тилла буюмлар кўринади. Шу маҳал унинг ортидан чопиб чиқсан учта милиционер етиб келиб, темирйўлчининг қўлини орқага қайириб, нарироқда турган машина томон олиб кетишади. Икки милиционер дипломатни ёпиб, улар ортидан юради.

Катта-катта биноларда, муҳташам кабинетларда ўтирган фуқаро кийимидағи, милиция кийимидағи бир неча кишиларнинг хибсга олинаётгани кўрсатилади.

* * *

Тошкент.

Кундуз.

Мўъжазгина қаҳвахона.

Кичкина стол атрофида фуқаро кийимидағи Олимов, Умаров ва фуқаро кийимидағи Камола ўтиришибди.

– Баҳай, тинчликми ўзи, – дейди Умаров Олимовга қараб. – Жа кафега таклиф қилиб қолдинг. Ё бу тўй олди репетициясими?

– Камолахон Дубай учун битта қўшимча юлдузча олди, энди у катта лейтенант, – дея изоҳ беради Олимов ғурур билан.

– Яхши. Лекин мен ҳам қуруқ қолмадим. Ёзувчилик ҳиссётим алдамади. Катта бир китобга, уч-тўртта шов-шувли мақолага арзирли материал йиғдим, – дейди Умаров мақтаниб. Сўнг Олимовга ўгирилади: – Сенга-чи, сенга нима беришди?

Олимов манглайидаги шишни кўрсатади:

– Мана!

Учовлон қулиб юборишиади.

– Кўрқма, тўйгача тузалиб кетади, – дейди Умаров. – Фақат... факат унгача махсус топшириқ бўлмай турсин-да ишқилиб.

– Шунинг учун таътилга чиқмоқчи бўлиб турибман, – дейди Олимов.

– Ҳеч бўлмаса тўйим кунлари bemalol юрай деб...

Шу пайт Олимовнинг қўл телефони жиринглаб қолади. Телефонни қулоғига тутган Олимов бир оғизгина:

– Хўп, – дейди ва телефонни қайтиб чўнтағига солиб қўяди.

– Тинчликми? – дейди Умаров.

– Дўстим, сен bemalol еб-ичиб ўтиравер, – дейди Олимов. – Мухим бир топшириқ чиқиб қолибди. Камолани ҳам чақиришаяпти. Бормасак бўлмайди.

– Ҳой, инсонлар, ҳеч бўлмаса қаҳвахонада одамга ўхшаб ўтирасаларинг-чи, – зорланади Умаров.

– Хизматчилик, Маҳмуд ака, – дейди ўрнидан туроётган Камола.

Умаров тўкин столга ишора қиласди:

– Нима, шунинг барини энди бир ўзим еб-ичаманми?

– Хафа бўлма, – дейди Олимов. – Ҳозир маҳмадона Шомуродовни юбораман, бир пасда чангини қоқиб ташлайди.

– Йўқ, дўстим, фақат уни эмас! – дейди жон ҳолатда Умаров.

– Айнан ўшани юбораман, – дейди йўлга тушаётган Олимов.

Камола қиқирлаб қулиб юборади.

Умаров қўлидаги кўпириб турган шампан виносини столга қўяди ва шўх-шодон ҳолда гаплашиб, қўлтиқлашиб кетаётган Акбарали билан Камола ортидан ҳавас билан қараб қолади.

* * *

Кундуз.

Тошкент.

Халқаро аэропорт ёни.

Аэропорт биносидан сал узоқроқдаги кўримсизгина машина ичида атрофни диққат билан кузатаётган терговчи Олимов, газета ўқиётган журналист Умаров ва рулга бошини қўйиб мудраётган прокуратура ходими Шомуродов ўтиришибди.

– Ана! – деб қолади ногаҳон Олимов.

Аэропорт биноси ёнбошига микроавтобус тўхтайди. Ундан ўнга яқин эркак-аёл чамадонларини қўтарган, судраган ҳолда тушиб келишади. Улар орасида қора қўзойнак тақиб олган Камола ҳам бор.

Камола атрофга олазарак қарайди ва узқда турган машинани кўргач, билинар-билинмас тарзда жилмаяди ва аста бош ирғаб қўяди. Сўнг гурухи билан ичкарига кириб кетади.

– Бу сафар қаёқقا? – деб сўрайди Умаров.

– Туркияга, – дейди Олимов.

– Топшириқ ўтган галгидайми? – дейди Умаров.

Қиз кетган бинодан кўз узмаётган Олимов билинар-билинмас бош ирғаб қўяди.

– Э Худо! – дейди асабийлашиб Умаров. – Бир нарсага тушунмаяпман: менга тўйларингни кўриш насиб этадими ёки йўқми?

– Шу топшириқни бажариб келсин, кейин иккаламизам таътилга чиқамиз-да, тўйни ўтказворамиз, – дейди Олимов.

– Тўй баҳона менам бир одамга ўхшаб дам олардим, – хомуза тортади Шомуродов.

– Ҳай билмадим-да, – ишонқирамай бош чайқайди Умаров. – Бу дунёда мамлакат кўп бўлса...

– Хўй-ўш, – кафтларини бир-бирига ишқайди Олимов. – Хайрлашишни тугатдик. Энди ишга ўтамиз.

– Қаёқка ҳайдай? – дейди қаддини ростлаган Шомуродов.

– Каримжон Мухторовнинг маҳалладошлари унинг маъракасини ўтказишшайти экан. Ўша ёққа борамиз, – дейди Олимов. – Маҳмуд, сени қаерда ташлаб кетайлик?

– Ташлаб кетишга овора бўлиб ўтирганлар, – дейди Умаров. – Бирга боравераман. Ёзувчилик хиссиётим...

– Унда кетдик, – дейди Олимов.

Машина текис йўлда елиб кетади.

(тамом)
